



水經第二十二

漢 桑 欽 撰

後魏 酈 道 元 注

明 吳 瑄 校

潁水

洧水

潁水

潁水

潁水出潁川陽城縣西北少室山

秦始皇十七年滅韓以其地為潁川郡蓋因水以

著稱者也漢高帝二年以為韓國王莽之左隊也

山海經曰潁水出少室山地理志曰出陽城縣陽

乾山今潁水有三源奇發右水出陽乾山之潁谷

春秋潁考叔爲其封人其水東北流中水導源少
室通阜東南流逕負黍亭東春秋定公六年鄭伐
馮滑負黍者也馮敬通顯志賦曰求善卷之所在
遇許由于負黍京相璠曰負黍在潁川陽城縣西
南二十七里世謂之黃城也亦或謂是水爲灑水
東與右水合左水出少室南谿東合潁水故作者
乃舉二三言水所發也呂氏春秋曰卞隨耻受湯
讓自投此水而死張顯逸民傳嵇叔夜高士傳並
言投河水而死未知其孰是也

又東南過其縣南

潁水又東五渡水注之其水導源崇高縣東北太
室東谿縣漢武帝置以奉太室山俗謂之崧陽城
及春夏雨泛水自山頂而迭相灌澍粵流相承爲
二十八浦也湯旱輟津而石潭不耗道路遊憩者
唯得飡飲而已無敢澡盥其中苟不如法必數日
不豫是以行者憚之山下大澤周數里而清深肅
潔水中有立石高十餘丈廣二十許步上甚平整
緇素之士多泛舟昇陟取暢山情其水東流南陽
城西石溜縈委溯者五涉故亦謂之五渡水東南
流入潁水潁水逕其縣故城南昔舜禪禹禹避商

均伯益避啓並於此也亦周公以土圭測日景處漢成帝永始元年封趙臨爲侯國也縣南對箕山山上有許由冢堯所封也故太史公曰余登箕山之上有所許由墓焉山下有牽牛墟側潁水有犢泉是巢父還牛處也石上犢跡存焉又有許由廟碑闕尚存是漢潁川太守朱寵所立潁水逕其北東與龍淵水合其水導源龍淵東南流逕陽城北又東南入于潁潁水又東平洛谿水注之水發玉女臺下平洛澗世謂之平洛水呂忱所謂勺水出陽城山蓋斯水也又東南流注于潁潁水又東出陽

城關歷亭東南魏明帝封尚書右僕射衛臻爲康鄉侯此卽臻封邑也

又東南過陽翟縣北

潁水東南流逕陽關聚聚夾水相對俗謂之東西二土城也潁水又逕上棘城西又屈逕其城南春秋左傳襄公十八年楚師伐鄭城上棘以涉潁者也縣西有故堰堰石崩禱頽基尚存舊遏潁水支流所出也其故瀆東南逕三封山北今無水渠中又有泉流出焉時人謂之嶠水東逕三封山東東南歷大陵西連山亦曰啓筮亭享神於大陵之上

卽鈞臺也春秋左傳曰夏啓有鈞臺之饗是也杜預曰河南陽翟縣南有鈞臺其水又東南流水積爲陂陂方十里俗謂之臺陂蓋陂指鈞臺取名也又西南流逕夏亭城西又屈而東南爲郊之靡陂潁水自塢東逕陽翟縣故城北夏禹始封於此爲夏國故武王至周曰吾其有夏之居乎遂營洛邑徐廣曰河南陽城陽翟則夏地也春秋經書秋鄭伯突入于櫟左傳曰桓公十五年突殺檀伯而居之服虔曰檀伯鄭守櫟大夫櫟鄭之大都宋忠曰今陽翟也周末韓景侯自新鄭徙都之王隱曰翟

本櫟也故潁川郡治也城西有郭奉孝碑側水有九山祠碑叢柏猶茂北枕川流也

又東南過潁陽縣西又東南過潁陰縣西南

應劭曰縣在潁水之陽故邑氏之按東觀漢記漢封車騎將軍馮防爲侯國防城門校尉位在九卿上絕席潁水又南逕潁鄉城西潁陰縣故城在東北舊許昌輿農都尉治也後改爲縣魏明帝封侍中辛毘爲侯國也潁水又東南逕柏祠曲東歷罌臺臨水方百步袁術所築也汝水別溝又東逕西門城卽南利也漢書宣帝封廣陵王厲子劉昌爲

侯也縣北三十里有孰城號曰北利故瀆出於二利之間關女陽之縣世名之歿汝縣取水名故汝陽也又東逕南頓縣故城又東南逕銅陽城北又東逕邱鄉城北又東逕固始縣故城北地理志縣故寢也寢丘在南故藉丘名縣矣王莽更名之曰治孫叔敖以土浸薄取而爲封故能綿嗣城北猶有叔敖碑建武二年司空李通又慕叔敖受邑故光武以嘉之更名固始別汝又東逕蔡岡北岡上有平陽侯相蔡昭冢昭字叔明周后稷之冑冢有石闕闕前有二碑碑字淪碎不可復識羊虎傾低

殆存而已枝汝又東北流逕胡城南而東歷汝陰縣故城西北東入潁水潁水又東逕汝陰縣故城北史記高祖功臣侯者年表曰高祖六年封夏侯嬰爲侯國王莽更名之曰汝濱也縣在汝水之陰故以汝水納稱城西有一城故陶丘鄉也汝陰郡汝城外東北隅有舊臺翼城若丘俗謂之女郎臺雖經頽毀猶自廣崇上有一井疑故陶丘鄉所未詳

又東南至慎縣東南入于淮

潁水東南流左合上吳百尺二水俱承次塘細陂

南流注于潁潁水又東南江陂水注之水受大崇丘城南故汾丘城也春秋左傳襄公十八年楚子庚治兵於汾司馬彪曰襄城縣有汾丘杜預曰在襄城縣之東北也逕繁昌故縣北曲蠡之繁陽亭也魏書國志曰文帝以漢獻帝延康元年行至曲蠡登禪于是地改元黃初其年以潁陰之繁陽亭爲繁昌縣城內有三臺時人謂之繁昌臺壇前有二碑昔魏文帝禪於此自壇而降曰舜禹之事吾知之矣故其石銘曰遂於繁昌築靈臺也於後其碑六字生金論者以爲司馬金行故曹氏六世遷

魏而事晉也潁水又東南流逕青陵亭城北北對青陵陂陂縱廣二十里潁水逕其北枝入爲陂陂西則澠水注之水出褒城縣之邑城下東流注于陂陂水又東入臨潁縣之狼陂潁水又東南流而歷臨潁縣也

又東南過臨潁縣南又東南汝南潁強縣北洧水從河南密縣東流注之

臨潁舊縣也潁水自縣西小潁水出爾雅曰潁別爲沙郭景純曰皆大水溢出別爲小水之名也亦猶江別爲沱也潁水又東南逕澤城北卽古城臯

亭矣春秋經書云冬諸侯盟于臯鼬者也臯澤字
相侶名與字垂耳潁水又東逕潁陽城南竹書紀
年曰孫何取潁陽潁強城在東北潁水不得逕其
北也潁水又東南潁水入焉非洧水也
又東過西華縣北

王莽更名之曰華望縣也有東故言西也世祖光
武皇帝建武中封鄧晨爲侯國漢濟北戴封字平
仲爲西華令遇天旱慨治功無感乃積柴坐其上
以自焚火起而大雨暴至遠近歎伏永元十三年
徵太常也縣北有習陽城潁水經其南也經所謂

洧水流注之也

又南過汝陽縣北

縣故城南有汝水枝流故縣得厥稱矣闕駟曰本
汝水別流其後枯竭號曰死汝水故其字無水余
按汝女乃方俗之音故字隨讀改未必一如闕氏
之說以窮通損字也潁水又東大潁水注之又東
南逕博陽縣城東城在南頓縣北四十里漢宣帝
封邴吉爲侯國王莽更名樂嘉

又東南過南頓縣北潁水從西來流注之

潁水於樂嘉縣入潁不至于頓頓故頓子國也周

之同姓春秋僖公二十五年楚伐陳納頓子于頓是也俗謂之潁陰城非也潁水又東南逕陳縣南又東南左會交口者也

又東南至新陽縣北浪蕩渠水從西北來注之

經云浪蕩渠者百尺溝之別名也南合交口新溝自是東出潁上有堰謂之新陽堰俗謂之山陽埭非也新溝自潁北東出縣在水北故應劭曰縣在新水之陽今縣故城在東明潁水不出其北蓋經誤耳潁水自東堰南流逕項縣故城北春秋僖公十七年魯滅項是矣潁水又東右合谷水水上承

平鄉諸陂東北逕南頓縣故城南側城東注春秋左傳所謂頓迫于陳而奔楚自頓徙南故曰南頓也今其城在頓南三十餘里又東逕項城中楚襄王所郭以爲別都都內西南小城項縣故城也舊潁州治谷水逕小城北又東逕刺史賈逵祠北王隱言祠在城北非也廟在小城東昔王凌爲宣王司馬懿所執屈廟而嘆曰賈良道王凌魏之忠臣唯汝有靈知之遂仰鳩而歿廟前有碑碑石金生于寶曰黃金可采爲晉中興之瑞谷水又東流出城東注潁潁水東側潁有公路城袁術所築也故

世因以術字名城矣潁水又東逕監潁城北城臨水闕南面又東逕雲陽二城間南北翼水並非所具又東逕丘頭丘頭南枕水魏書郡國志曰宣王軍次丘頭王凌面縛水次故號武丘矣潁水又東南流於故城北細水注之水上承陽都陵陂水枝分東南出爲細水東逕新陽縣故城北又東南逕宋公縣故城北縣鄴丘者也秦伐魏取鄴丘謂是邑矣漢成帝綏和元年詔封殷後於沛以存三統平帝元始四年改曰宋公章帝建初四年徙邑於此故號新鄴爲宋公國也王莽之新延矣細水又

南逕細陽縣新溝注之新溝首受交口東北逕新陽縣故城南漢高帝六年封呂清爲侯國王莽更名曰新明也故應劭曰縣在新水之陽今無水故渠舊道而已東入澤渚而散流入細細水又東南逕細陽故城南王莽更之曰樂慶也世祖建武中岑彭子遵爲侯國細水之東南積而爲陂謂之次塘公私列裂以供田溉又東南流屈而西南入潁地理志曰細水出細陽縣東南入潁潁水又東南流逕胡城故東胡子國也春秋定公十五年楚滅胡以胡子豹歸是也杜預釋地曰汝陰縣西地有

胡城也潁水又東南汝水枝津之水上承汝水別
瀆於竒頡城東三十里世謂之大灑水也東南逕
召陵縣故城南春秋左傳僖公四年齊桓公師于
召陵責楚貢不入卽此處也城內有大井徑數丈
水至清深闕駟曰召者高也其地丘墟井深數丈
故以名焉又東南逕征羌縣故邵陵縣之安陵鄉
安陵亭也世祖建武十一年以封中郎將來歛歛
以征定西羌功故更名征羌也闕駟引戰國策以
爲秦昭王欲易地謂此也汝水別瀆又東逕公路
臺北陂陂水南流積爲江陂南逕慎城西側城南

流入于潁潁水又逕慎縣故城南縣故楚邑白公
所居以拒吳春秋左傳哀公十六年吳人伐慎白
公敗之王莽之慎治也世祖建武中封劉賜爲侯
國潁水又東南逕蜩螭郭東俗謂之鄭城矣又東
南入于淮春秋昭公十二年楚子狩于州來次于
潁尾蓋潁水之會淮也

洧水出河南密縣西南馬領山

水出上下亦言出潁川陽城山山在陽城縣之東
北蓋馬領之統目焉清水東南流逕一故臺南俗
謂之陽子臺又東逕馬領塢北在山上塢下泉流

水經 卷之三十一
北注亦謂洧別源也而入于洧水洧水東注綏水
會焉水出方山綏谿卽山海經所謂浮戲之山也
東南流逕漢弘農太守張伯雅墓塋四周壘石爲
垣隅阿相降列於綏水之陰庚門表二石闕夾對
石獸於闕下冢前有石廟列植三碑碑云德字伯
雅河內密人也碑側樹兩石人有數石柱及諸石
數矣舊引綏水南入瑩城而爲池沼沼在丑地皆
蟾螭吐水石隍承溜池之南又建石樓石廟前又
翼列諸獸但物謝時淪凋毀殆盡矣富而非義比
之浮雲况復此乎王孫士安斯爲達矣綏水又東

南流逕上郭亭南東南注洧洧水又東襄荷水注
之水出北山子節谿亦謂之子節水東南流于洧
洧水又東會歷滴水出深谿之側泉流丈餘懸
水散注故世士以歷滴稱南流入洧水也

又東南過其縣南

洧水又東流南與承雲二水合俱出承雲山二源
雙導東南流注于洧世謂之東西承雲水洧水又
東微水注之水出微山東北流入于洧洧水又東
逕密縣故城南春秋謂之新城左傳僖公六年會
諸侯伐鄭圍新密以鄭不時城也今縣城東門南

側有漢密令卓茂祠茂字子康南陽苑人溫仁寬雅恭而有禮人有認其馬者茂與之曰若非公馬幸至丞相府歸我遂挽車而去後馬主得馬謝而還之任漢黃門郎遷密令舉善而徵口無惡言教化大行道不拾遺蝗不入境百姓爲之立祠享祀不輟矣洧水又左會瓌泉水水出王亭西北流注于洧水水又東南與馬關水合水出王亭下東北流歷馬關謂之馬關水又東北注于洧洧水又東合武定水水出北武定岡西南流又屈而東南流逕零鳥塢西側塢東南流塢側有水懸流赴壑一

匹有餘直注澗下淪積成淵嬉遊者矚望奇爲佳觀俗人覩此水挂于塢側遂目之爲零鳥水東南流入于洧洧水又東與虎牘山水合水發南山虎牘谿東北流入洧洧水又東南赤澗水注之水出武定岡東南流逕皇臺岡下又歷岡東東南流注于洧洧水又東南流澗水注之洧水又東南逕鄒城南世本曰陸終娶于鬼方氏之姝謂之女漬是生六子孕三年啓其左脅三人出焉破其右脅三人出焉其四曰求言是爲之鄒鄒人者鄭是也鄭桓公問於史伯曰王室多難子安逃死乎史伯曰

魏郟公之民遷之可也鄭氏東遷魏郟獻十邑焉
劉禛云郟在豫州外方之北北鄰於郟魏熒之南
左濟右洛居陽鄭兩水之間食溱洧焉徐廣曰郟
在密縣妘姓矣不得在外方之北也洧水又東逕
陰坂北水有梁焉俗謂是濟爲參辰口左傳襄公
九年晉伐鄭濟于陰坂次于陰口而還是也杜預
曰陰坂洧津也服虔曰登南曰陰口者水口也參
陰聲相近蓋傳呼之謬耳入晉居商參之分實沈
之上鄭虔辰火之野闕伯之地軍師所次故濟得
其名也

又東過鄭縣南郟水從西北來注之

洧水又東逕新鄭故城中左傳襄公元年晉韓厥
荀偃帥諸侯伐鄭入其郛敗其徒兵於洧上是也
竹書紀年晉文侯二年同惠王子多父伐郟克之
乃居鄭父之丘名之曰鄭是曰桓公皇甫士安帝
王世紀云或言縣故有熊氏之墟黃帝之所都也
鄭氏徙居之故曰新鄭矣城內有貴祠名曰章乘
是也洧水又東爲洧淵水春秋傳曰龍鬪于時門
之外洧淵則此潭也今洧水自鄭城西北入而東
南流逕鄭城南城之南門內舊外蛇與內蛇鬪內

蛇死六年大夫傅瑕殺鄭子入厲公自是徵也水南有鄭莊公望毋臺莊姜惡公寤生與段京居段不弟姜氏無訓莊公居夫人故城穎誓曰不及黃泉無相見也故城臺以望毋用伸在心之思感考叔之言忻大隧之賦洩洩之慈有嘉融融之孝得常矣洧水又東與黃水合經所謂澗水非也黃水出太山南黃泉東南流逕華城西史伯謂鄭桓公曰華君之土也韋昭曰華國名矣史記秦昭王三十三年白起攻魏拔華陽走芒卯斬首十五萬司馬彪曰華陽亭名在密縣嵇叔夜常采藥於山澤

學琴於古人卽此亭也黃水東南流又與上水合水出兩塘中一源兩分泉流派別東爲七虎澗水西流卽是水也其水西南流注于黃水黃卽春秋之所謂黃崖也故杜預云苑陵縣西有黃水者也又東南流水側有二臺也謂之積粟臺臺東卽二水之會也捕章山水注之水出東捕章山西流注于黃水黃水又南至鄭城北東轉於城之東北與黃溝合水出捕章山東南流至鄭城東北入黃水黃水又東南逕龍淵泉東南七里溝水注之水出隰候亭東南平地東注又屈而南流逕升城東又

其南歷燭城西卽鄭大夫燭之武邑也又南流注于浦水也

又東南過長社縣北

洧水東南流南濮北濮二水入焉洧水又東南與龍淵水合水出長社縣西北有故溝上承洧水水盛則通注龍淵水減則律渠輟流其瀆中滋泉南注東轉爲淵淥水平潭清潔澄深俯視游魚類若乘空矣所謂淵無潛鱗也又東逕長社縣故城北鄭之長葛邑也春秋隱公五年宋人伐鄭圍長葛是也後社樹暴長故曰長社魏潁川郡治也余以

景明中出宰茲郡於南城西側修立客館版築旣興於土下得一樹根甚壯大疑是故社怪長暴茂者也稽之故說縣無龍淵水名蓋出近世矣京相璠春秋土地名曰長社北界有稟水但是水導於隍澗之中非北界之所謂又按京社地名並云長社縣北有長葛鄉斯乃縣徙于南矣然則是水卽稟水也其水又東南逕棘城北左傳所謂楚子伐鄭救齊次于棘澤者也稟水又東左注洧水洧水又東南分爲二水也其枝水東北流注沙一水東逕許昌縣故許南國也姜姓四岳之後矣穆天子

傳所謂天子見許男于洧上者也漢章帝建初四年更封馬光爲侯國春秋助期曰漢以許昌失天下及魏承漢曆遂改名許昌也城內有景福殿基魏明帝太和中造准價八百餘萬洧水又東入汶倉城內俗以是水爲汶水故有汶倉之名非也蓋洧水之邸閣耳洧水又東逕隱陵縣故城南李竒曰六國爲安陵也昔秦求易地唐且受使於此漢高帝十二年封都尉諸濞爲侯國王莽更名左亭洧水又東隱陵陂水注之水出隱陵南陂東西南流注于洧水也

又東南過新汲縣東北

洧水自隱陵東逕桐丘南俗謂之天井陵又曰岡非也洧水又屈而南流流水上有梁謂之桐門橋藉桐丘以取稱亦言取桐門亭而目焉然不知亭之所在未之詳也洧水又東南逕桐丘城春秋左傳莊公二十八年楚伐鄭鄭人將奔桐丘卽此城也杜預春秋釋地曰潁川許昌城東北京相璠曰鄭地也今圖無而城見存西南去許昌故城可三十五里俗名之曰隄其城南卽長隄因洧水之北防也西面桐丘其城邪長而不方蓋憑丘之稱卽

城之名矣洧水又東逕新汲縣故城北漢宣帝神
雀二年置於許之汲鄉曲洧城以河內有汲縣故
加新也漢宣帝建初四年封執金吾馬光爲侯國
城在洧水南隄上又東洧水右迤爲濩陂洧水又
逕匡城南扶溝之匡亭也又東洧水左迤爲鴨子
陂也謂之大穴口也

又東南過茅城邑之東北

洧水自穴口東南逕洧陽城西南逕茅城東北又
南左合庾溝溝水上承洧水於大穴口東北枝分
東逕洧陽故城南俗謂之復陽城非也蓋洧復字

類音讀變漢建安中封司空祭酒郭奉孝爲侯國
其水又東南爲鴨子陂陂廣一十五里餘波南入
甲庾溝西注又東北瀉沙洧水又南逕一故城西
世謂之思鄉城西去洧十五里洧水又右合濩陂
水上承洧水新波縣南逕新汲故城東又南積而
爲陂陂之西北卽長舍城陂水東翼洧隄西面茅
邑自城北門列築昆道迄於此岡世尚謂之茅岡
卽經所謂茅邑地也陂水北出東入洧津西納北
異流

又東過習陽城西折入于潁

洧水又東南逕辰亭東俗謂之田城非也蓋田辰聲相近城亭音韻聯故也經書魯宣公十一年楚子陳侯鄭伯盟于辰陵也京相璠曰潁川長平有故辰亭杜預曰長平縣東南有辰亭今此城在長平城西北長平城在東南或杜氏之謬傳書之誤耳長平東南淋陂北畔有一阜東西減里南北五十許步俗謂之新亭臺又疑是杜氏所謂辰亭而未之詳也洧水又南逕長平縣故城西王莽之長正也洧水又南分爲二水枝水東出謂之五梁溝逕習陽城北又東逕赭丘南丘上有故城郡國志

曰長平故屬汝南縣有赭丘城卽此城也又東逕長平城南東注滂陂洧水南出謂之雞籠水故水會有籠口之名矣河水又東逕習陽城西西南折入潁地理志曰洧水東南至長平縣入潁者也

潁水出河南密縣大騮山

大騮卽具茨山也黃帝登具茨之山升于洪堤上受神芝圖于黃蓋童子卽是山也谿水出其阿而流爲陂俗謂之玉女池東逕陘山北史記魏襄王六年敗楚于陘山者也山上有鄭祭仲冢冢西有子產墓累石爲方墳墳東有廟並東北向鄭城杜

元凱言不忘本際廟舊有一枯柏樹其塵根故株
之上多生雉柏列秀青青望之奇可嘉矣潁水又
東南逕長社城林城西北南濮北濮二水出焉劉
澄之著永初記云水經濮水源出大騮山東北流
注泗衛靈聞音於水上殊為乖矣余按水經為潁
水不為濮也是水首受谿水川渠雙引俱東注有
洧與之過沙枝流脉亂牙得通稱是以春秋昭公
九年遷城父人於陳以夷濮西田益之京相璠云
以夷之濮西田益也杜預亦言以夷田在濮水西
者與城父人服虔曰濮水名也且字類音同津澗

邈別不得為北濮上源師氏傳音於其上矣潁水
又南逕鍾亭西又南逕皇帝又東南逕關亭西又
東南逕宛亭西鄭大夫宛射犬之故邑也潁水又
南分二水一水南出逕胡城東故潁陰縣之狐人
亭也其水南結為陂謂之胡城陂潁水自枝渠東
逕曲強東皇陂水注之水出西北皇臺七女岡北
皇陂卽古長社縣之濁澤也史記魏惠王元年韓
懿侯與趙成侯合軍伐魏戰于濁澤是也其陂水
北對雞鳴城卽是社縣之濁城也陂水又南流逕
胡泉城北故潁陰縣之狐宗鄉也又東合狐城陂

水水上承陂水而東南流注于黃水謂之合作口而東逕曲强城北東流入潁水時人謂之勅水非也勅潁音相類故字從聲變耳渭水又東逕武亭間兩城相對疑是古之岑門史遷所謂走犀首于岑門者也徐廣曰潁陰有岑亭未知是否潁水又南逕射犬城東卽鄭公孫射犬城也蓋俗謬耳潁水又南逕潁陰縣故西魏明帝封司空陳羣爲侯國俱水城西又東逕許昌城南又東南與宣帝陂水合陂上承狼陂於潁陰城西南陂南北二十里東西十里春秋左傳曰楚子伐鄭師于狼是也其

水東南入許昌縣逕臣陵城北鄭地也春秋左氏傳莊公十四年鄭厲公獲傅瑕于大陵京相璠曰潁川臨潁縣東北二十五里有故臣陵亭古大陵也其水又東積而爲陂謂之宣梁陂也陂水又東南入潁水潁水又西南流逕陶城西又東南逕陶陂東

東南入于潁潯水出鄭縣西北平地

鄆水出鄆城北西雞絡塢下東南流逕賈復城西東南流左右澁水水出賈復城東南流注于潯潯水又南左會承雲山水水出西北承雲山東南歷

水經 卷之三十三
渾于江東注世謂岡峽爲五鳴口東南流注于澗
澗水又東南流歷下田川逕鄆城西謂之爲柳泉
水也故史伯荅桓公曰君以成周之衆奉辭伐罪
若剋虢鄆君之土也如前莘後河左洛右濟王丕
驪而食澗洧循典刑以守之可以少固卽謂此矣
澗水又南懸流奔壑崩注丈餘其下積水成潭廣
四十許步淵深難測又南注于洧詩所謂溱與洧
者也世所謂之爲鄆水也

東過其縣北又東南過其縣東又南入于洧水
自鄆澗東南更無別瀆不得逕新鄭而會洧也鄭

城東入洧者黃崖水也蓋經誤證耳

渠出滎陽北河東南過中牟縣之北

風俗通曰渠者水所居也渠水自河與沛亂流東
滎澤北東南分沛歷中牟縣之圃田澤北與陽武
分水澤多麻黃草故述征記曰踐縣境便覩斯卉
窮則知踰界今雖不能然諒亦非謬詩所謂東有
圃艸也皇武子曰鄭之有原圃猶秦之有具圃澤
在中牟縣西西限長城東極官渡北佩渠水東西
四十許里南北二百許里中有沙岡上下二十四
浦津津流逕通淵潭相接各有名焉有大斬小斬

大灰小灰義魯練秋大白楊小白楊散味禹中牟
囿大鵠龍澤鬯罷大哀小哀大長小長大縮小縮
伯丘大蓋牛眠等浦水盛則北注渠溢則南播故
竹書紀年梁惠成王十年入河水于甫田又爲大
溝而引甫水者也又有一瀆自酸棗受河道自漢
瀆歷酸棗逕陽武縣南出世謂之十字溝而屬於
渠或謂是瀆爲渠惠之年所開而不能詳也斯甫
乃水澤之所鍾爲鄭隰之淵藪矣渠又右合王池
溝上承澤水中流渠謂之五也口魏嘉平二年司
馬懿帥中軍討大尉王凌於壽春自彼而還帝使

侍中韋誕勞軍于五池者也今其地爲五池鄉矣
渠又東不家溝水注之出京縣東南梅山北谿春
秋襄公十八年薦子馮公子格率銳師侵費右廻
梅山杜預曰在密東北卽是山也其水自谿東北
流逕管城西故管國也周武以封管叔矣成王幼
弱周公攝政管叔流言曰公將不利於孺子公賦
鴟鷃以伐之卽東山之詩是也左傳宣公十二年
晉師救鄭楚次管以待之杜預曰京縣東北有管
城者是也俗又謂之爲管水東北分爲二水一水
東北流注黃雀溝謂之黃淵淵周一百步其一水

東越長城東北流水積爲淵南北二里東西百步
謂之百尺水北人圃田澤分爲二水一水東北逕
東武強城北漢書曹參傳斬擊羽嬰於昆陽追至
業還攻武強因至滎陽薛瓚云按武強城左陽武
縣卽斯城也漢高帝六年封騎將莊不識爲侯國
又東北流左注于渠爲不家水口也一水東流又
屈而南轉東南注白溝也渠又東清池水注之清
池水出清陽亭西南平地東北流逕清陽亭南東
流卽故清人城也詩所謂清人在彭彭爲高剋邑
也故杜預春秋釋地云中牟縣西有清陽亭是也

清水又屈而北流至清口澤七虎澗水注之水出
畢城南岡一源兩派津川趣別西入黃崖溝東爲
七虎谿亦謂之爲華水也又東北流紫光溝水注
之水出華陽城東北而東流俗名曰紫光澗又東
北注華水華水又東逕棊城北卽北林亭也春秋
文公與鄭伯宴于棊林子家賦鴻鴈者也春秋宣
公元年諸侯會于棊林以伐鄭楚救鄭遇于伯林
服虔曰北林鄭南地也京相璠曰今滎陽苑陵縣
有故林鄉在新鄭北故曰伯林也余按林鄉故城
在新鄭北東如北七十許里苑故城東南五十許

里不得在新鄭北也考京服之說並爲疎矣杜預云滎陽中牟縣西南有林亭在鄭北今是亭南去新鄭故城四十許里蓋以南有林鄉亭故杜預據是爲北林最爲密矣又以林鄉爲棊亦或疑焉諸侯會棊楚遇于此寧得知不在是而更指他處也積古之傳事或不謬矣又東北逕鹿臺南岡北出爲七虎澗東流期水注之水出期城西南平地世號龍淵水東北流又北逕期地西又北與七虎澗合謂之虎谿水亂流不注逕期城北東會清口水司馬彪郡國志曰中牟有清口水卽是水也清水

又東北白溝水注之水有二源北水出密之梅山東南而東逕靖城南與南水合水南出合太山西北流至靖城南左注北水卽承水也山海經曰承水出太山之陰東北流注于沒水者也世所謂之靖澗水也又東北流太水注之水出太山東平地山海經曰太水出于太山之陽而東南流注于沒水世謂之澧水也東北逕武陵城西東北流注于承水又東北入黃羗澗北逕中陽城西城內有舊臺甚秀臺側有陂池池水清深澗水又東屈逕其城北竹書紀年梁惠成王十七年鄭釐侯來朝中

陽者也其水東北流爲白溝又北東逕伯禽城北
蓋伯禽之魯往逕所由也屈而南流東注于清水
卽潘岳都碑所謂自中牟故縣以西西至于清溝
指是水也亂流東逕中牟宰魯恭祠南漢和帝時
右扶風魯恭字仲康以太尉掾遷中牟令政專德
化不任刑罰吏民敬信蝗不入境河南尹袁安疑
不實使部掾肥親按行之恭隨親行阡陌坐桑樹
下雉止其傍有小兒親曰兒何不擊雉曰將雛親
起曰蟲不入境一異化及鳥獸二異豎子懷仁三
異久留非優賢請還是年嘉禾生縣庭安美其治

以狀上之徵博士侍中車駕每出恭常陪乘上顧
問民政無所隱諱故能遺愛自古祠饗來今矣清
溝水又東北逕沈清疑卽博浪亭也服虔曰博浪
陽武二水沙名也今有亭所未詳也歷博浪澤昔
張良爲韓報仇於秦以金椎擊秦始皇不中中其
副車於此又北分於二水枝津東注没水清水自
枝流北注渠謂之清溝口渠又左逕陽武縣故城
南東爲官渡水又逕曹太祖壘北有高臺謂之官
渡臺渡在中牟故世又謂中牟臺建安五年太祖
營官渡袁紹保陽武紹連營稍前依沙堆爲屯東

西數十里公亦分營相禦合戰不利紹進臨官渡
起土山地道以逼壘公亦起高臺以捍之卽中牟
臺也今臺北土山猶在山之東悉紹舊營遺臺並
存水又東逕田豐祠北袁本初慙不納其言害之
時人嘉其誠謀無辜見戮故立祠於是用表袁氏
覆滅之宜矣又東沒水注之水出苑陵縣西隰侯
亭東世謂此亭爲却城非也蓋隰郤聲相近耳中
平陂世名之溼泉也卽古役水矣山海經曰役山
役水所出北流注于河疑是水也東北流逕苑陵
縣故城北東流北逕焦城東陽丘亭西也謂之焦

溝水竹書紀年梁惠成王十六年秦公孫壯武鄭
圍焦城不尅卽此城也俗謂之驛城非也役水自
陽丘亭東流逕山氏城北爲高榆淵竹書紀年梁
惠成王十六年秦公孫壯率師城上枳安陵山氏
者也又東北爲酢溝又東北魯溝水出焉役水又
東北溼溝水出焉又東北爲八丈溝又東清水枝
津注之水自沈城東派注于役水又東逕曹公壘
南東與沫水合山海經云沫水所出北流注于役
今是水出中牟城西南疑卽沫水也東北流逕中
牟縣故城昔趙獻侯自耿都此班固云趙自邯鄲

徙焉趙襄子時佛肸以中牟叛置鼎於庭不與已者烹之田英將褰裳赴鼎處也薛瓚注漢書云中牟在春秋之時之爲鄭之堰也及三卿分晉則在魏之邦土趙自漳北不及此也春秋傳曰衛侯如晉過中牟非衛適晉之次也汲郡古文曰齊師伐趙東鄙圍中牟此中牟不在趙之東也按中牟當在濕水之上矣按春秋齊伐晉夷儀晉車千乘在中牟衛侯過中牟中牟人欲伐之衛褚師固亾在中牟曰衛雖小其君在未可勝也齊師尅城而驕遇之必敗乃敗齊師服虔不列中牟所在杜預曰

今滎陽有中牟迴遠疑爲非也然地理參差土無常域隨其疆弱自相吞并疆理留移寧可一也兵車所指逕紆難知自魏徙大梁趙以中牟易魏故趙之南界極于浮水匪直專張也趙自西取後正中牟齊師伐其東鄙於宐無嫌而瓚逕濕水空言中牟所在非論證也漢高帝十一年封單父聖爲侯國沫水又東北注于役水昔魏太祖之背董卓也間行出中牟爲亭長所錄郭長公世語爲縣所拘功曹請釋焉役水又東北逕中牟澤卽鄭太叔攻藿蒲之盜於是澤也其水東流北屈注渠水征

續記所謂自醬魁城到酢溝十里者渠水又東流而左會淵流其水上承聖女陂陂周二百餘步水無耗竭湛然清滿而南流注于渠渠水又東南而注大梁也

又東至浚儀縣

水東南逕西赤城北戴延之所謂西北有大梁亭非也竹書紀年梁惠成王二十八年穰苴率師及鄭孔夜戰于梁赫鄭師敗逋卽此城也左則故瀆出焉秦始皇二十年王賁斷故渠引水東南出以灌大梁謂之梁溝又東逕大梁城南本春秋之陽

武高陽鄉也於戰國爲大梁周梁伯之居也梁伯好土功大其城號曰新里民疲而潰秦遂取焉後魏惠王自安邑徙都之故曰梁耳竹書紀年梁惠成王六年四年甲寅徙都于大梁是也秦滅魏以爲縣漢文帝封孝王於梁孝王以土地下濕東都睢陽又改曰梁自是置縣以大梁城廣居其東城夷門之東夷門卽侯嬴抱關處也續述征記曰以此城爲師曠城言郭緣生曾遊此邑踐夷門升吹臺終古之跡緬焉盡在余謂此乃梁氏之臺門魏惠之朝居非吹臺也當是誤證耳西征記論儀封

人卽此縣又非也竹書紀年梁惠成王三十一年
三月爲大溝於此郭以行圃田之水陳畱風俗傳
曰縣北有浚水像而儀之故曰浚儀余謂故汴涉
陰溝矣浚之故曰治其猶春秋之浚洙漢氏之儀
水又東北逕中牟縣南又東北逕中牟澤與淵水
合水出中牟縣城北城有層臺按郭公世語及于
寶晉紀並言中牟縣故魏任城王臺下池中有漢
時鐵錐長六尺入地三尺頭西南指不可動止月
朔自正以爲晉氏中興之瑞而今不知所在或言
在中陽城池臺未知焉是淵水自池西出屈逕其

城西而東南流注于汜汜水又東逕大梁亭南又
東逕梁臺南東注渠渠水又東南流逕開封縣睢
渙二水出焉右則新溝注之其水出逢池池上承
役水于苑陵縣別爲魯溝水東南流逕開封縣故
城北漢高帝十一年封陶舍爲侯國也陳畱志稱
阮蘭字茂弘爲開封令縣側有劫賊外白甚急數
阮方圍碁長嘯吏云劫急阮曰局上有劫亦甚急
其耽樂如是故語林曰王中郎以圍碁爲坐隱或
亦謂之爲手談又謂之爲碁聖魯溝南際富城東
南入百尺陂卽古之逢澤也徐廣史記音義曰秦

孝公會諸侯于逢澤陂陂汲郡墓竹書紀年作逢澤斯其處也故應德璉西征賦曰鸞衡東指弭節逢澤其水東北流爲新溝新溝又東北流逕牛首鄉北謂之牛建城又東北注梁卽沙水也音蔡許慎正作沙音言水散石也從水少水沙見矣楚東有沙水謂此水也無佗也皆變名矣其國多池沼時池中出神劍到今其民像而作之號大梁氏之劍也渠又北屈分爲二水續述征記曰汴沙到浚儀而分也汴東注沙南流其水更南流逕梁王吹臺東陳畱風俗傳曰縣有蒼頡師曠城上有列仙

之吹臺北有牧澤中出蘭蒲土多僂髻今帶牧澤方一十五里俗謂之蒲關澤卽謂此矣梁王增築以爲吹臺城隍夷滅畧存故跡今層臺孤立於牧澤之右矣其臺方一百許步卽阮嗣宗詠懷詩所謂駕言發魏都南向望吹臺簫管有遺音梁生安在哉晉世喪亂乞活憑居削墮故基遂成一層上基猶方四五十步高一丈餘世謂之乞活臺又謂之婆臺城梁水於此有陰溝鴻溝之稱焉項羽與漢高分王指是水以爲東西之別故蘇秦說魏襄王曰太王之地南有鴻溝是也故尉氏縣有波鄉

亭波亭鴻溝鄉鴻溝亭皆藉水以立稱也今蕭縣西亦有鴻溝亭梁國睢陽縣東有鴻溝亭先後談者亦指此以爲楚漢之分王非也蓋春秋之所謂紅澤者矣渠右與汜水合其上承役水于苑陵縣故鄭都也王莽之左亭縣也役水枝津東派爲汜水者也而世俗謂之汜溝水也春秋左傳僖公三十年晉侯秦伯圍鄭晉軍函陵秦軍汜南所謂東汜者也

又屈南至扶溝縣北

沙水又東南逕牛首鄉東南魯渠水出焉亦謂之

宋溝也又逕陳畱縣故城南孟康曰畱鄭邑也後爲陳井故曰陳畱矣魯溝又東南逕圍縣故城北縣苦楚難修其干戈以圍其患故曰圍也或曰邊陲之號矣歷萬人散王莽之篡也東郡太守翟義興兵討莽莽遣奮威將軍孫建擊之於圍北義師大敗尸積萬數血流溢道號其處爲萬人散百姓哀而祠之又歷魯溝亭又東南至陽夏縣故城西漢高祖六年封陳豨爲侯國魯溝又南入渦今無水也沙水又東南逕斗城西左傳襄公三十年子產殯伯有尸其臣葬之於是城也沙水又東南逕

牛首亭東左傳桓公十四年宋人與諸侯伐鄭東郊取牛首者也俗謂之車牛城矣沙水又東南八里溝出焉又東南逕陳畱縣裘氏鄉裘氏亭西又逕澹臺子羽冢東與八里溝合按陳畱風俗傳曰陳畱縣裘氏鄉有澹臺子羽冢又有子羽祠祈禱焉京相璠曰今泰山南武城縣有澹臺子羽冢縣人也未知孰是因其方志所叙就記纏絡焉溝水上承沙河而西南流逕牛首亭南與百尺陂水合其水自波南逕開封城東三里岡左屈而西流南轉注八里溝又南得野兔水口水上承西南兔氏

亭北野兔陂鄭地也春秋傳云鄭伯勞屈生于兔氏也陂水東北入八里溝八里溝水又南逕右倉城西又南逕兔氏亭東又南逕邵亭西東入沙水沙水南逕扶溝縣故城東縣卽潁川之數平鄉也有扶亭又有洧水溝故縣有扶溝之名焉建武元年漢光武封平狄將軍朱鮪爲侯國沙水又東與康溝水合水首受洧水於長社縣東東北逕向岡西卽鄭之向鄉也後人遏其上口今水盛則北注水耗則輟流又有長明溝水注之水出苑陵縣故城西北縣有二城此則西城也二城以東悉多陂

澤卽古制澤也京相璠曰鄭地杜預曰澤卽滎陽苑陵縣東卽春秋之制田也故城西北平地出泉謂之龍淵泉淵水流逕陵丘亭西又西重泉水注之水出西城北平地泉湧南流逕陵丘亭西西南注龍淵水龍淵水又東南逕凡陽亭西而南入白鴈陂陂在長社東北東西七里南北十里在林鄉之西南司馬彪郡國志曰苑陵有林鄉亭白鴈陂又引瀆南流謂之長明溝東轉北屈又東逕向城北城側向岡左傳襄公十一年諸侯伐鄭師于向者也又東右迤爲染二陂而東注于蔡澤陂長明

溝又東逕尉氏縣故城南園稱云尉氏鄭國之東鄙弊獄官名也鄭大夫尉氏之邑故欒盈曰盈將歸歿于尉氏也溝瀆自是三分北分爲康溝東逕平陸縣故城北高后元年封楚元王子禮爲侯國建武元年以戶不滿三千罷爲尉氏縣之陵樹鄉又有陵樹亭漢建安中封尚書荀攸爲陵樹鄉侯故陳留風俗傳曰陸樹鄉故平陸縣也北有天澤名曰長樂廐康溝又東逕城溝縣之白亭北陳留風俗傳曰扶溝縣有帛鄉帛亭名在七鄉十二亭中康溝又東逕少曲亭陳留風俗傳曰尉氏縣有

少世亭俗謂之爲小城也又東南逕扶溝縣故城東而東南注沙水沙水又南會南水其水南流又分爲二水一水南合關亭東又東南流與左水合其水自枝瀆南逕召陵亭西疑卽扶溝之亭也而東南合石水世以是水與隱陵陂水雙導亦謂之雙溝又東南入沙水沙水南與蔡澤陂水合水出隱陵城西北春秋成公十六年晉楚相遇于鄢陵呂錡射中共王目王召養由基使射殺之亦子反醉酒自斃處也陂東西五里南北十里陂水東逕匡城北城在新汲縣之東北卽扶溝縣之巨亭也

亭在匡城郭春秋文公元年諸侯朝晉衛成公不朝使孔達侵鄭伐縣訾及匡卽此邑也今陳畱長垣縣南有匡城卽平丘之匡亭也襄邑又有承匡城然匡居陳衛之間亦往往有異邑矣陂水又東南至扶洛城北又東南入沙水沙水又南逕小扶城西而流也城卽扶溝縣之平周亭東漢順帝永平中封陳敬王孫子恭爲侯國沙水又東南逕大扶城西城卽扶鄉故縣也城北二里有袁梁碑云梁陳扶樂人後漢世祖建武十七年更封劉隆爲扶樂侯卽此城也渦水於是分焉不得在扶溝北

便分爲二水也

其一者東南過陳縣也

沙水又東南逕東華城西又東西沙水枝瀆西南
達洧謂之甲更溝今無水沙水又南與廣漕渠合
上承龐官陂云鄧艾所開也雖水流廢與溝瀆尚
夥昔賈逵爲魏豫州刺史通運渠二百里餘亦所
謂賈侯渠也而川渠逕復交錯畛陌無以辨之沙
水又東逕長平縣故城北又東南逕陳城北故陳
國也伏羲神農並都之城東北三十許里猶有羲
神實中舜後媯滿爲周陶正城王賴其器用妻以

元女太姬而封諸陳以備三恪太姬好祭祀故詩
所謂坎其擊鼓苑丘之下也苑丘在陳城南道東
王隱云漸欲平今不知所在矣楚討陳殺夏徵舒
於栗門以爲夏州後城之東門內有池池水東西
七十步南北八十許步水至清潔而不耗竭不生
魚草水中有故臺處詩所謂東門之池也城內有
漢相王君造四縣邸碑文字剥落不可悉識其畧
曰唯茲陳國故曰淮陽郡云云王清惠著聞爲百
姓畏愛求賢養士千有餘人賜與田宅更舍自損
俸錢助之成邸五官掾西華陳騏等二百五人以

延熹二年云云故其頌曰修德立功四縣內附今
碑之左右遺壙尚存基礎猶在時人不復尋其碑
證云孔子廟學非也後楚襄王爲秦所滅徙都於
此文頽曰西楚矣三楚斯其一焉城南郭裏又有
一城名曰淮陽城子產所置也漢高帝十一年以
爲淮陽國王莽更名新平縣曰陵陳故豫州治王
隱晉書地道記云城北有故沙名之爲歿沙而今
水流津通漕運所由矣沙水又東而南屈逕陳城
東謂之百尺溝又南分於二水沙水出焉溝水東
南流谷水注之水源上承澇陂陂在陳城西北南

暨華城皆爲陂矣陂水東流謂之谷水東逕澇城
北王隱曰犂北有谷水是也犂卽穰矣經書公會
齊宋于穰者也杜預曰穰穰卽犂也在陳縣西北
爲非穰小城也在陳郡西南谷水又東流逕陳城
南又東流入于沙沙水又東南流注于頽謂之交
口水次有大堰卽古百尺堰也魏書國志曰司馬
宣王討太尉王凌大軍至百尺塢卽此塢也今俗
呼之爲山陽堰非也蓋新水首受頽於百尺溝王
莽名郡爲新平故堰兼有新陽之名也以是推之
悟故俗謂之非也

又東南至汝南新陽縣北

沙水自百尺溝東逕寧平縣之故城南晉陽秋稱
晉太傅東海王越之東奔也石勒追之憤尸於此
數十萬衆斂手受害勒縱騎圍射尸積如山王夷
甫歿焉余謂俊者所以智勝羣情辨者所以文身
祛惑夷甫雖體荷雋令口擅雌黃汗辱君親獲罪
羯勒史官方之舉正諒爲褒矣沙水又東積而爲
陂謂之陽都明水注之水上沙水之津東出逕汝
南郡之宜祿縣故城北王莽之賞都亭也明水又
東北流注于陂陂水東南流謂之細水又東逕新

陽縣北又東高陂水東出焉沙水又東分爲二水
卽春秋所謂夷濮之水也枝津北逕譙縣故城南
側城入渦沙水東南逕城父縣西南枝津出焉俗
謂之章水也一水東注卽注水也俗謂之欠水也
東逕城父縣之故城南東流注之

又東南過山桑縣北

山桑故城在渦水北沙水不得逕其北明矣經言
過北誤也

又東南過龍亢縣南

沙水故城北又東南逕白鹿城北而東注也

又東南過義城縣西南入于淮
義城縣故屬沛後隸九江沙水東流注于淮謂水
沙汭京相璠曰楚東地也春秋左傳昭公二十七
年楚令尹子常以舟師及沙汭而還杜預曰沙水
名也

水經第二十二

水經第二十三

漢 桑 欽撰
後魏 酈道元注
明 吳 瑄校

陰溝水 汲水

陰溝水出河南陽武縣蒗蕩渠

陰溝首受於大河卷縣故瀆東南逕卷縣故城南
又東逕蒙城北史記秦莊襄王元年蒙騫擊取成
臯滎陽初置三川郡疑卽騫所築也於是未詳故
瀆東分爲二世謂之陰溝京相璠以爲出河之濟

又非所究俱東絕濟隊右溝東西逕陽池城北東
南絕長城逕安亭北又東北會左瀆左瀆又東絕
長城逕垣雍城南昔晉文公戰勝于楚周襄王勞
之於此故春秋書甲午至于衡雖作王宮於踐土
呂氏春秋曰尊天子於衡雖者也郡國志曰卷縣
有垣雖城卽史記所記韓獻秦桓公是也又東逕
開光亭南又東逕清陽亭南又東合右瀆又東南
逕封丘縣絕濟瀆東南至大梁合滎蕩渠梁溝旣
門滎蕩渠故瀆實兼陰溝浚儀之稱故云出武陽
逕大梁城北左屈溝與梁合俱東南流同受鴻溝

也故目其川流之會左瀆東導者卽汜水也蓋津
源之變名矣故經云陰溝出滎蕩者也

東南至沛爲過水

陰溝始亂滎蕩終別於沙而過水出焉過水受沙
於扶溝縣爾雅曰過爲洵郭景純曰大水溢出別爲
水也呂忱曰洵過水也過水逕大扶城西城之東
北悉諸袁舊基碑字傾低羊虎碎折唯司徒滂蜀
郡太守騰博平令光碑字所存唯此自餘殆不可
尋過水入東南逕陽夏縣西又東逕邈城北城實中
而西有瓌郭過水又東逕大棘城南故鄢之大棘

鄉也春秋宣公二年宋華元與鄭公子歸生戰于大棘獲華元左傳曰華元殺羊食士其御羊斟不與及戰曰疇昔之羊子爲政今日之事我爲政遂御入鄭故見獲焉後其地爲楚莊所并故圈稱曰大棘也地有楚太子建之墳及伍員釣臺池沼具存過水又東逕安平縣故城北陳留風俗傳曰大棘鄉故安平縣也士人敦養易以統御過水又東逕鹿邑城北世謂之虎鄉城非也春秋之鳴鹿矣杜預曰陳國武平西南有鹿邑亭是也城南十里有晉中散大夫胡均碑元康八年立過水之北有

漢溫令許續碑續字嗣公陳國人也舉賢良拜議郎遷溫令延熹中立過水又東逕武平縣故城城之西南七里許有漢尚書令虞詡碑碑題云虞君之碑諱詡字定安康仲後爲朝歌令武都太守文字多缺不復可尋按范曄漢書詡字升鄉陳國武平人祖爲縣獄吏治存寬恕嘗曰于公爲里門子爲丞相吾雖不及于公子孫不必不爲九卿故字詡曰升卿定安蓋其幼字也魏武王初封於此終以武平華夏矣過水又東逕廣鄉城北圈稱曰襄邑有蛇丘亭故鄉矣改曰廣世後漢順帝陽嘉四

年封侍中摯填爲侯國卽廣鄉也過水又東逕苦
縣西南分爲二水枝流注于東北賴城入谷謂死
過也過水又南東屈逕苦縣故城南郡國志曰春
秋之相也王莽更名之曰賴陵矣城之四門列築
馳道東起賴鄉南自南門越水直指故臺西面南
門列道徑趣廣鄉道西門馳道西屆武平北門馳
道暨于北臺過水又東而北屈至潁鄉谷水注之
谷水首受渙水于襄邑縣東東逕承匡城東春秋
經書夏叔彭生會晉郤缺于承匡左傳曰謀諸侯
之從楚也京相璠曰今陳留襄邑西三十里有故

承匡城谷水又東南逕已吾縣故城西陳留風俗
傳曰縣故宋也雜以陳楚之地故梁國寧陵縣之
徙種龍鄉也以成哀之世戶至八九千冠帶之徒
求置縣矣永元十一年陳王削地以大棘鄉直陽
鄉十二年自隱隸之命以嘉名曰已吾猶有陳楚
之俗焉谷水又東逕柘縣故城東地理志淮陽之
屬縣也城內有柘令許君清德頌石碎字紊唯此
文見碑城西南里許有漢陽種令許叔臺碑光和
中立又有漢故樂成陵令太尉掾許嬰碑嬰字虞
卿司隸校尉之子建寧六年立餘碑文字碎滅不

復可觀當似司隸諸碑也谷水又東逕苦縣故城
中水泛則四周隍漸耗則孤津獨逝谷水又東逕
賴鄉城南其城實中東北隅有臺偏高俗以是臺
在谷水北其城又謂之谷陽臺非也谷水自此東入
過水過水又北逕老子廟東廟前有二碑在南門
外漢桓帝尼宮管霸祠老子命陳相邊韶作碑北有
雙石闕甚整頓石闕南側魏文帝黃初三年逕譙
所勒闕北東側有孔子廟廟前有一碑西面是陳
相魯國孔疇建和三年立北則老君廟廟東院中
有九井焉又北過水之側又有李老母廟廟在

老子廟北廟前有李母冢冢東有碑是永興元年
譙令長沙王阜所立碑云老子生於曲過間許慎
又云過水首受淮陽扶溝縣菴蕩渠不得至沛方
爲過水也過水又屈東逕相縣故城南其城卑小
實中邊韶老子碑又云老子楚相縣人也相縣虛
荒今屬苦故城猶存在賴游鄉之東過水處其陽
然卽此城也自是無郭以應之過水又東逕譙縣
故城北春秋左傳僖公二十二年楚成得臣帥師
伐陳遂取譙城頓而還是也王莽之延成亭也魏
立譙郡沅州治沙水自南枝分北逕譙城西而北

注過水四周城側城南有曹嵩冢冢北有碑碑
北有廟堂餘基尚存柱礎仍在廟北有二石闕雙
峙高一丈六尺椽櫨及柱皆雕鏤雲炬上學魚已
碎闕北有圭碑題云漢故中常侍長樂太僕特進
費亭侯曹君之碑延熹三年立碑陰又刊石策二
碑文同夾碑東西列對兩石馬高八尺五寸石作
粗拙不匹炆武隧道所表象馬也有兄騰冢冢東有
碑題云漢故潁川太守曹君墓延熹九年卒而不
刊樹碑歲月墳北有其元子熾冢冢東有碑題云
漢故長水校尉曹君之碑歷太中大夫司馬長史

引侍中遷長水年三十九卒熹平六年造熾翁胤
冢冢東有碑題云漢謁者曹君之碑熹平六年立
城東有曹太祖舊宅所在負郭對廛側隍臨水魏
書曰太祖作議郎告疾歸鄉里築室城外習讀書
傳秋冬射獵以自娛樂文帝以漢中平四年生於
此上有青雲如車蓋終日乃解卽是處也後文帝
以延康元年幸譙大饗父老立壇於故宅壇前樹
碑碑題云大饗之碑碑之東北過水南有譙定王
司馬士會冢冢前有碑晉永嘉三年立碑南二百
許步有兩石柱高丈餘半下爲束竹交文作制乃

士石旂云晉故使持節散騎常侍都督揚州江州
諸軍事安東大將軍譙定王河內溫公司馬墓之
神道過水又東逕朱龜墓北東南流逕冢南冢南
枕道有碑碑題云漢故幽州刺史朱君之碑龜字
汨靈光和六年卒官故吏別駕從事史石北平無
終年化中平二年造碑陰刊故吏姓名悉薊涿及
上谷北平等入過水東南逕層丘北丘阜獨秀巍
然介立故壁壘所在也過水又東南逕城父縣故
城沙水枝分注之水上承沙水於思善縣世謂之
漳水故有漳頭之名也東北流逕城父故城西側

城東北流入於澗過水又東逕下父城北郡國志
曰山桑縣有下父聚者也過水又屈逕其聚東郎
山西又東南屈逕郎山南山東有垂惠聚世謂之
禮成表崧郡國志曰山桑縣有垂惠聚卽此城也
過水又東南逕過陽城北臨側過水魏太和中爲州
治以蓋表爲刺史後罷州立郡衿帶遏戍過水又
東南逕龍亢縣故城南漢建武十三年世祖封傳
昌爲侯國故語曰沛國龍亢至山桑者也過水又屈
而南流出石梁梁石崩褫夾岍積石高二丈水歷
其間又東南流逕荆山而東流注也

又東南至下邳淮陵縣入于淮

過水又東左合北肥水肥水出山桑縣西北澤藪東南流左右翼佩數源異出同歸蓋微脉消注耳山桑侯疑食邑於此城東南有一碑碑文悉破無驗唯碑背故吏姓名尚存熹平元年義北門生沛國蕭劉定興立北肥水又東逕山桑縣故城南俗謂之都亭城非也今城內東側猶有山亭築立陵阜高峻非洪臺所擬十三州志所謂山生於邑其庭有桑因以氏縣者也郭城東有文穆冢碑三世

二千石穆郡戶曹史徵試博士太常丞以明氣候擢拜侍中右中郎將遷九江彭城陳留四部光和中卒故吏涿郡太守彭城呂虔等立北肥水又東積而爲陂謂之瑕陂陂水又東南逕瑕城南春秋左傳成公十六年楚師還及瑕卽此城也故京相璠曰瑕楚地北肥水又東南逕向縣故城南地理志曰故向國也世本曰許州向中姜姓也炎帝後京相璠曰向沛國縣今并屬譙國龍亢也杜預曰龍亢縣東有向城漢世祖建武十三年更封富波侯王霸爲侯國卽此城也俗謂之圓城非又東南逕

義城南世謂之楮城非又東入于過過水又東注
淮經言下邳淮陵入淮誤矣

汧水出陰溝于浚儀縣北

陰溝卽菴蕩渠也亦言汧受旃然水又云丹泌亂
流於武德絕河南入滎陽合汧故汧兼丹水之稱
河沛水新汧承旃然而東自王實灌大梁水出縣
南而不逕其北夏水洪泛則是瀆津通故渠卽陰
溝也於大梁北又曰浚水矣故圈稱著陳留風俗
傳曰浚水逕其北者也又東汧水出焉故經云汧
出陰溝於浚儀縣北也汧水東逕倉垣城南卽大

梁縣之倉垣亭也城臨汧水陳留相畢邈治此征
東將軍荀晞之西也邈走歸京晞使司馬東萊王
讚代據倉垣斷留運漕汧水又東逕陳留縣之鉞
鄉亭北陳留風俗傳所謂縣有鉞鄉亭卽斯亭也
汧水又逕小黃縣故城南神仙傳稱靈壽允扶風
人死於江陵胡罔家罔殯埋之後百餘日人有見
允於此縣寄書於罔罔發視之唯有履存汧水又
東逕鳴鴈亭南春秋左傳成公十六年衛侯伐鄭
至于鳴鴈者也杜預釋地云在雍丘縣西北今俗
人尚謂之爲白鴈亭汧水又東逕雍丘縣故城北

逕陽樂城南西征記曰城在汭北一里周五里雍
丘縣界汭水又東有故渠出焉南通睢水謂之董
生決或言董氏作亂引水南通睢水故斯水受名焉
今無水汭水又東枝津出焉俗名之爲洛架口西
征記曰洛架水名也續述征記曰在董生決下二
里汭水又逕外黃縣南又東逕莠倉城北續述征
記曰莠倉城去大游墓二十里又東逕大齊城南
陳留風俗傳曰外黃縣有大齊亭又東逕科城北
陳留風俗傳曰縣有科稟亭是則料稟亭也汭水
又東逕小齊城南汭水又南逕利望亭南風俗傳

曰故曰成安也地理志曰陳留舊名漢武帝以封
韓延年爲侯國汭水又東龍門故瀆出焉瀆舊通
睢水故西征記曰龍門水名也門北有土臺高三
丈餘上方數十步汭水又東逕濟陽考城縣故城
南爲留獲渠考城縣周之采邑也於春秋爲戴國
矣左傳莊公十年秋宋衛蔡伐戴是也漢高帝十
一年秋封彭祖爲侯國陳留風俗傳曰秦之穀縣
也後遭漢兵起邑多災年故改曰留縣王莽更名
嘉穀漢章帝東巡過縣詔曰陳留縣其名不善高祖
鄙柏人之邑世宗休聞喜而顯獲嘉應亨吉元符

嘉皇靈之故賜越有先列考武王其改留縣曰考
城是瀆蓋因縣以獲名矣汧水又東逕寧陵縣之
沙陽亭北故沙隨國矣春秋左傳成公十六年秋
會于沙隨謀伐鄭也杜預釋地曰在梁國寧陵縣
北沙陽亭是也世以爲堂城非也汧水又東逕黃
蒿塢北續述征記曰堂城至黃蒿二十里汧水又
東逕斜城下續述征記曰黃蒿到斜城五里陳留
風俗傳曰考城縣有斜亭汧水東逕周塢側續述
征記曰斜城東三里晉義熙中劉公遣東超之自
彭城緣泛故溝斬樹穿道七百餘里以開水路停

薄於此故茲塢流稱矣汧水又東逕葛城北故葛
伯之國也孟子曰葛伯不祀湯問曰何爲不祀稱
無以供祠祭遺葛伯葛伯又不祀湯又問之曰無
以供犧牲湯又遺之又不起湯又問之曰無以供
粢盛湯使亳衆往爲之耕老弱饋食葛伯又率民
奪之不授者則殺之湯乃伐葛葛於六國屬魏魏
襄王以封公子無咎號信陵君其地葛鄉卽是城
也在寧陵縣四十里汧水又東逕神坑塢又東逕
夏侯長塢續述征記曰夏侯塢至周塢各相距五
里汧水又東逕梁國睢陽縣故城北而東歷襄鄉

塢南續述征記曰西去夏侯塢二十里東一里卽襄鄉浮圖也汧水逕其南漢熹平君所立死因葬之弟刻石樹碑以進厥德隧前有師子天鹿累博作百達柱八所荒蕪頽毀凋落略盡矣

又東至梁郡蒙縣爲濉水餘波南入淮陽城中

汧水又東逕貫城南俗謂之薄城非也關駟十三州志以爲貫城也在蒙縣西北春秋僖公二年齊侯宋公江黃盟于貫杜預以爲貫也云貫貫字相似貫在齊謂貫澤也是以非此也今於此地更無他城在蒙西北唯是邑耳考文准地貫邑明矣非

毫可知汧水又東逕違縣故城北俗謂之小蒙城也西征記城在汧水南十五六里卽莊周之本邑也爲蒙之漆園吏郭景純所謂漆園有傲吏者也悼惠施之沒杜門於此邑矣汧水自縣南出今無復有水唯睢陽城南側有小水南流入于睢城南二里有漢太傅掾橋載墓碑載字元賓梁國睢陽人也睢陽公子熹平五年立城東百步有石室刊石漢鴻臚橋仁祀城北五里有石虎石柱而無碑誌不知建也汧水又東逕大蒙城北自古不聞有二蒙疑卽蒙毫也所謂景薄爲此毫矣椒舉云商

湯有景亳之命者也闕駟曰湯都也亳本帝嚳之墟在禹貢豫州河洛之間今河南偃師城西二十里尸鄉亭是也皇甫謐以爲考之事實學者失之如孟子之言湯居亳與葛爲隣是卽亳與葛比也湯地七十里葛又伯耳封域有限而寧陂去偃師八百里不得童子饋餉而爲之耕今梁園自有二亳南亳在穀熟北亳在蒙非偃師也古文仲虺之誥曰葛伯仇餉征自葛始卽孟子之言是也崔駟曰湯冢在濟陰薄縣北皇覽曰薄城北郭東三里平地有湯冢冢四方各十步高七尺上平也漢

哀帝建平元年大司空史郤長卿按行水災因行湯冢在漢屬扶風今徵之迴渠亭有湯地徵陌是也然不經見難得而詳按秦寧公本紀云二年伐湯三年與亳戰亳王奔戎遂滅湯然則周穆桓王時自有亳王號湯爲秦所滅乃西戎之國葬于徵者也非殷湯矣劉向言殷湯無葬處爲疑杜預曰梁國蒙縣北有薄伐城城中有成湯冢其西有箕子冢今城內有故冢方墳疑卽杜元凱之所謂湯冢者也而先謂之王子喬冢冢側有碑題云仙人王子喬碑曰王子喬者蓋上世之真人聞其仙不

知興何代也博問道家或言潁川或言產蒙初建
此城則有斯立傳承先民曰王氏墓暨于永和之
元年冬十二月當臘之時夜上有哭聲其音甚哀
附居者王伯怪之明則祭而察焉時天鴻雪下無
人徑有大鳥跡在祭祀處左右咸以爲神其後有
人著大冠絳單衣杖竹立冢前呼採薪孺子伊永
昌曰我王子喬也勿得取吾墳上樹也忽然不見
時令太山萬喜稽故老之言感精瑞之應乃造靈
廟以休厥神於是好道之儔自遠方集或絃琴以
歌太一或譚以歷丹思知至德之兆寔真人之

祖先延熹八年秋八月皇帝遣使者奉犧牲致禮
祠濯之敬肅如也國相東萊王璋字伯義以爲神
聖所興必有銘表乃與長史邊乾遂樹之玄石紀
頌遺烈觀其碑文意似非遠既有經見不能不書
存

獲水出汲水於梁郡蒙縣北

漢書地理志曰獲水也十三州志曰首受留獲渠
亦兼丹水之稱也竹書紀年曰宋殺其大夫皇緩
于丹水之上又曰宋大水丹水壅不流蓋汲水之
變名也獲水自蒙東山水南有漢故繹幕令匡碑

匡字公輔魯府君之少子也碑字碎落不可尋識
竟不知所立歲月也獲水又東逕長樂固北已氏
縣南東南流逕于蒙澤十三州志曰蒙澤在縣東
春秋莊公十二年宋萬與公爭博殺閔公于斯澤
矣泐水又東逕虞縣故城北古虞國也昔夏少康
逃奔有虞爲之庖正虞思於是妻之以二姚者也
王莽之陳定亭也城東有漢司徒盛允墓公字伯世
梁國虞人也其先奭氏至漢中葉避孝元皇帝諱
改姓曰盛世濟其美以迄于公察孝廉除郎累遷
司空司徒延熹中立墓中有石廟廟宇傾頽基構

可尋獲水又東南逕空桐澤北澤在虞城東南春
秋哀公二十六年冬公遊于空澤辛巳卒于運中
大尹左師興空澤之士壬午奉公自空桐入如沃
宮者矣獲水又逕龍譙國又東合黃水口上承黃
陂下注獲水獲水又東入櫟林世謂之九里祚獲
水又東南逕下邑縣故城北楚考烈王滅魯頃公
亾遷下邑又楚漢彭城之戰呂后弟周軍於下邑
高祖敗還從周軍子房肇捐地之策收垓下之師
戰陸機所謂卽下邑者也王莽更名下洽矣獲水
又東逕碭縣故城北應劭曰縣有碭山山在東

水經 卷之二十三
出文石秦立碭郡蓋取山之名也王莽之節碭縣也山有梁孝王墓其冢斬山作郭穿石爲藏行一里到藏中有數尺水水有大鯉魚黎萌謂藏有神不敢犯之凡到藏皆潔齋而進不齋者至藏輒有獸噬其足獸難得見見者云侶狗所未詳也山上有梁孝王祠獲水又東穀水注之上承陽陂陂中有香城城在四水之中承諸陂散流謂零水瀼水清水也積而成潭謂之碭水趙人有琴高者以善鼓琴爲康王舍人行彭涪之術浮遊碭郡間二百餘年後入碭水中取龍子與弟子期曰皆潔齋待

於水傍設屋祠果乘赤鯉魚出入坐祠中碭中有千萬人觀之留月餘復入水也破水東注謂之穀水東逕安山北卽碭北山也山有陳勝墓秦亂首兵伐秦弗終厥謀死葬於碭謚曰隱王也穀水又東北注于獲水獲水又東歷藍內鄉郭又東逕梁國杼秋縣故城南王莽之子秋也獲水又東歷洪溝東注之水南北各一溝溝首對獲世謂之洪溝非也春秋昭公八年秋蒐于紅杜預曰沛國蕭縣西有紅亭卽地理志之虹縣高后三年封楚王元子富爲侯國王莽之所謂貢矣蓋溝名是同非楚

漢所分也

又東過蕭縣南

獲水北流注之蕭縣南對山世謂之蕭城南山也
戴延之謂之同孝山云取漢陽城侯劉德所居里
名目山也劉澄之云縣南有冒山未詳孰是也山
有箕谷谷水北流注獲世謂之西流水言水上承
梧桐陂陂水西流因以爲名也余嘗逕蕭邑城右
唯是水北注獲水更無別疑卽經所謂睢水也城
東西及南三面臨側獲水故沛郡治縣亦同居矣
城南舊有石橋處耗積石爲梁高二丈今荒毀殆

盡亦不具誰所造也縣本蕭叔國宋附庸楚滅之
春秋宣公十二年楚伐蕭蕭潰申公巫臣曰師人
多寒王巡三軍拊而勉之三軍之士皆同挾纊蓋
恩使之然矣蕭女媯齊爲頃公之母卻克所謂蕭
同叔子也獲水又東歷龍城不知誰所創築也獲
水又東逕同孝山北山陰有楚元王冢上圓下方
累石爲之高十餘丈廣百許步經十餘墳悉結石
也獲水又東淨淨溝水注之水上結梧桐陂西北
流卽劉中書澄之所謂白溝水也又北入于獲俗
名之曰淨淨溝也

又東至彭城縣北東入于泗

獲水自淨淨溝東逕阿育王寺北或言楚王英所造非所詳也蓋遵育王之遺法因以名焉與安陂水合水上承安陂餘波北逕阿育王寺側水上有梁謂之玄注橋水傍有石墓宿經開發石作工奇殊爲莊構而不知誰冢疑卽澄之所謂凌冢也水北流注于獲獲水又東逕彌黎城北劉澄之永初記所謂城之西南有彌黎城者也獲水於彭城西南迴而北流逕彭城城西北舊有楚大夫龔勝宅卽楚老哭勝處也獲水又東轉逕城北而東注泗水

北三里有石冢被開傳言楚元王之孫劉向冢未詳是否城卽殷大夫彭祖之國也於春秋爲宋地楚伐宋并之以封魚石崔子季珪述初賦曰想黃公於邳汜勒魚石於彭城卽是縣也孟康曰舊名江陵爲南楚陳爲東楚彭城爲西楚文穎曰彭城故東楚也項羽都謂之西楚漢祖定天下以爲楚郡封弟交爲楚王都之宣帝地節元年更爲彭城郡王莽更之曰和樂郡也徐州治城內有漢司徒表安魏中郎徐庶等數碑並列植於街右咸魯爲楚相也大城之內有金城東北小城劉公更開廣

之皆壘石高四丈列塹環之小城西又一城是大
司馬琅邪王所修因項羽故臺經始卽構宮觀門
閣惟新厥制義熙十二年霖雨驟澍汴水暴長城
遂崩壞冠軍將軍彭城劉公之子也登更築之悉
以塼壘宏壯堅峻樓櫓赫奕南北所無宋平北將
軍徐州刺史河東薛安都舉城歸魏魏違博陵公
尉苟仁城陽公孔伯恭援之邑閣如初觀不異昔
自後毀撤一時俱盡問遺工雕鏤尚存龍雲逞勢
奇爲精妙矣城之東北角起層樓於其上號曰彭
祖樓地理志曰彭城縣故彭祖國也世本曰陸終

之子其三曰錢是爲彭祖彭祖城是也下曰彭祖
冢彭祖長年八百綿壽永世於此有冢蓋亦元極
之化矣其樓之側汴帶泗東此爲二水之會也登
望川原極目清野斯爲佳處矣

水經第二十三

水經第二十四

漢 桑 欽撰

後魏 酈道元注

明 吳 瑄校

睢水

瓠子水

汶水

睢水出梁郡鄆縣

睢水出陳留縣西菴蕩渠東北流地理志曰睢水首受陳留浚儀菴蕩水也經言出鄆非矣又東逕高陽故亭北俗謂之陳留北城非也蘇林曰高陽者陳留北縣也按在留使鄉聚名也有漢廣野君

廟碑延熹六年十二月雍丘令董生仰餘徽於千載遵茂美於絕代命縣人萇照爲文用章不朽之德其畧云輟洗分餐諮謀帝猷陳鄭有涿鹿之功海岱無牧野之戰大康華夏綏靜黎物生民以來功盛莫崇今故字無聞而軍碑介立矣陳留風俗傳曰酈氏居於高陽沛公攻陳留縣酈食其有功封高陽侯有酈峻字文山官至公府掾大將軍商有功食邑于涿故自陳留縣有鉞亭鉞鄉建武二年世祖封王常爲侯國也睢水又東逕雍丘縣故城北縣舊杞國也殷湯周武以封夏后繼禹之嗣

楚滅杞秦以爲縣圈稱曰縣有五陵之名故以氏縣矣城內有夏后祠昔在二代享祀不輟秦始皇圖築其表爲大城而以縣焉睢水又東水積成湖俗謂之白羊陂陂方四十里右則姦梁陂水注之其水上承陂水東北逕雍丘城北又東分爲兩瀆謂之雙溝俱入白羊陂陂之東合洛架水口水上承汜水謂之洛架水東南流入于睢水睢水又東逕襄邑縣故城北又東逕雍丘城北睢水又東逕寧陵縣故城南故葛伯國也王莽改曰康善矣歷鄆縣北二城南北相去五十里故經有出鄆之文

城東七里水次有單父令楊彥尚書郎楊禪字文節兄弟二碑漢炁和中立也

又東過睢陽縣南

睢水又東逕橫城北春秋左傳昭公二十一年樂大心豐愆華輕禦華向於橫杜預曰梁國睢陽縣南有橫亭今在睢陽縣西南世謂之炁城蓋炁橫聲相近習傳之非也睢水又逕新城北卽宋之新城亭也春秋左傳文公十四年公會宋公陳侯衛侯鄭伯許男曹伯晉趙盾盟于新城者也睢水又東逕高鄉亭北又東逕亳城北南亳也卽湯所都

矣睢水又東逕睢陽縣故城南周武王封微子啓于宋以嗣殷後爲宋都也昔宋元君夢江使乘輜車被繡衣而謁於元君元君感衛平之言而求之于泉陽男子余且獻神龜於此矣秦始皇二十二年以爲碭郡漢高祖嘗以沛公爲碭郡長天下旣定五年爲梁國文帝十二年封少子武爲梁王太后之愛子景帝寵弟也是以警衛貂侍飾同天子藏珍積多擬京師招延豪傑士咸歸之長卿之徒免官來遊廣睢陽城七十里大治宮觀臺苑屏榭勢並皇居其所經構也役夫流唱必曰睢陽創傳

曰此始也城西門卽寇先鼓琴處也先好釣居睢水傍宋景公問道不告殺之後十年止此門鼓琴而去宋人家奉事之南門曰盧門也春秋華氏居盧門里叛杜預曰盧門宋城南門也司馬彪郡國志曰睢陽縣有盧門亭城內有高臺甚秀廣巍然介立超焉獨上謂之螽臺亦曰升臺焉當昔全盛之時故與雲霞競遠矣續述征記曰迴道似螽故謂之螽臺非也余按闕子稱宋景公使工人爲弓九年乃成公曰何其遲也對曰臣不復見君矣臣之精盡於弓矣獻弓而歸三日而死景公登虎圈

之臺援弓東面而射之矢踰于孟霜之山集于彭城之東餘勢逸勁猶飲羽于石梁然則螽臺卽是虎圈臺也蓋宋世牢虎所在矣晉太和中大司馬桓溫入河命豫州刺史袁真開石門鮮卑堅戍此臺真頓甲堅城之下不果而還螽南如西又有一臺俗謂之女郎臺臺之西北城中有涼馬臺臺東有曲池池北列兩釣臺水周六七百步螽臺直東又有一臺世謂之雀臺也城內東西道北有晉梁王妃王氏陵表竝列二碑碑云妃諱粲字女儀東萊曲城人也齊北海府君之孫司空東武景侯之

季女咸熙元年嬪于司馬氏泰始二年妃于國太
康五年薨營陵于新蒙之太康九年立碑東卽梁
王之吹宮也基陛階礎尚在今建追明寺故宮東
卽安梁之舊地也廣周五六百步水列釣臺池東
又有一臺世謂之清泠臺北城憑隅又結一池臺
晉灼曰或說平臺在城中東北角亦或言兔園在
平臺側如淳曰平臺離宮所在今城東二十里有
臺寬廣而不甚極高俗謂之平臺余按漢書梁孝
王傳稱王以功親爲大國築東苑方三百里廣睢
陽城七十里大治宮室爲複道自宮連屬於平臺

三十餘里複道自宮東出楊州之門左陽門卽睢
陽東門也連屬於平臺側近矣屬之城隅則不能
是知平臺不在城中也梁王與鄒枚司馬相如之
徒極遊於其上故齊隨郡王山居序所謂西園多
士平臺盛賓鄒馬之客咸在伐木之歌屢陳是用
追芳昔娛神遊千古故亦一時之盛事謝氏賦雪
亦曰梁王不悅遊於兔園今也歌堂淪宇律管埋
音孤墓塊立無復曩日之望矣城北五五六里便得
漢太尉喬玄墓冢東有廟卽曹氏孟德親酌處操
本微素嘗候於玄玄曰天下將亂能安之者其在

君乎操感知已矣經玄墓祭云操以頑質見納君子士死知已懷此無忘又承約言徂沒之後路有經由不以斗酒隻雞過相沃酹車過三步腹痛勿怨雖臨時戲言非至親篤好胡肯爲此辭哉悽愴致祭以申宿懷冢列數碑一是漢朝羣儒英才哲士感喬氏德行之美乃共刊石立碑以示後世一碑是故吏司徒博陵崔列廷尉河南吳整等以爲至德在已揚之由人苟不驕述夫何舍焉乃共勒嘉石昭明芳烈一碑是隴西枹罕北次陌碭守長隲爲左尉漢陽獮道趙馮孝高以喬公嘗牧涼州

感三綱之義慕將順之節以爲公之勳美宜宣舊邦乃樹碑頌以昭令德兗和元年主記掾李反字仲遼作碑文碑陰有石鼎文建寧三年拜司空又有中鼎文建寧四年拜司徒又有左鼎文兗和元年拜太尉鼎名文曰故臣門人相與述公之行容度體則文德銘于三鼎武功勒于征鉞書于碑陰以昭允懿又有鉞文稱是用鏤石假象作茲征鉞軍鼓陳之于東階亦以昭公之文武之勳焉廟南列二石柱柱東有二石羊羊北有二石虎廟前東北有石駝駝西北有二石馬皆高大亦不甚雕飾

惟廟頽構粗傳遺墉石鼓仍存鉞今不知所在睢
水於城之陽積而爲逢洪陂陂之西南有陂又東
合明水水上承城南大池池周千步南流會睢謂
之明水絕睢注渙睢水又東南流歷于竹園水次
綠竹蔭渚菁菁實望世人言梁王竹園也睢水又
東逕穀熟縣故城北睢水又東蘄水出焉睢水又
東逕粟縣故城北地理志曰侯國也王莽曰成富
睢水又東逕大丘縣故城北地理志曰故丘也
漢武帝元朔三年封魯恭王子節侯劉政爲侯國漢
明帝更從今名列仙傳曰仙人文賓邑人賣鞞履

爲業矣睢水又東逕芒縣故城北漢高帝六年封
酈跖爲侯國王莽之傳治世祖改曰臨睢城西二
里水南有豫州從事皇毓碑殞身州牧陰君之罪
時年二十五臨睢長平與李君二千石承輪氏夏
文則高其行而悼其殞州國咨嗟旌閭表墓昭叙
令德式示後人城內有臨睢長左馮翊王君碑善
有治功累遷廣漢屬國都尉吏民思德縣人公府
掾陳盛孫郎中倪定興劉伯鄜等共立石表政以
刊遠績縣北與碭縣分水有碭山芒碭縣之間山
澤深固多懷神智有仙者涓子石柱並隱碭山得

道漢高祖隱之呂后望氣知之卽於是處也京房
易候曰何以知賢人隱師曰視四方常有
大雲五色具而不雨其下賢人隱矣

又東過相縣南屈從城北東流當蕭縣南入于睢
相縣故宋地也秦始皇二十三年以爲泗水郡漢
高帝四年改曰沛郡治此漢武帝元狩六年封南
越桂林監居翁爲侯國曰湘成也王莽更名之吾
符縣曰吾符亭也睢水東逕石馬亭亭西有漢故
伏波將軍馬援墓睢水又東逕相縣故城南宋恭
公之所都也國府園中猶有伯姬黃堂基堂夜被

火左右曰夫人少避伯姬曰婦人之義保傳不具
夜不下堂遂遇火而死斯堂卽伯姬燬死處也城
西有伯姬冢昔鄭渾爲沛郡太守於蕭相二縣興
陂堰民賴其利刻石頌之號曰鄭陂睢水又左合
白瀆水水上承梧桐陂陂側有梧桐山陂水西南
流逕相城東而南流注于睢睢盛則北流入于陂
陂溢則西北注於睢出入迴環更相通注故經有
入睢之文睢水又東逕彭城郡之靈壁東東南流
漢書項羽敗漢王子靈壁東卽此處也又云東逼
穀泗服虔曰水名也在沛國相界又詳睢水逕穀

熟兩分而睢水爲蘄水故二水所在枝分通爲兼稱穀水之名蓋因地變然則穀水卽睢水也又云漢軍之敗也睢水爲之不流睢水又東南逕竹縣故城南地理志曰王莽之篤亭也李奇曰今竹邑縣也睢水又東與淠湖水合水上承留丘縣之淠陂南北百餘里東西四十里東至朝解亭西屆彭城留丘縣之故城東王莽更名之曰善丘矣其水自陂南系于睢水睢水又東南八丈故溝水注之水上承蘄水而北會睢水又東逕符離縣故城北漢武帝元光四年封路博德爲侯國王莽之符合也睢

水東逕臨淮郡之取慮故城北昔汝南步遊張少失其母及爲縣令遇母於此乃使良馬踟躕輕軒罔進顧訪病姬乃其母也誠願宿憑而冥感昭徵矣睢水又東合烏慈水水出縣西南烏慈渚潭漲東北流與長直故瀆合溝舊上承蘄水北流八十五里注烏慈水烏慈水又東逕取慮縣南又東屈逕其城東而北流注于睢睢水又東逕睢陵縣故城北漢武帝元朔元年封江都易王子劉楚爲侯國王莽之睢睦也睢水又東與潼水故瀆會舊上承潼縣西南潼陂東北流逕潼縣故城北又東北逕睢

陵縣下會睢水又東南流逕下相縣故城南高祖十二年封莊侯冷耳爲侯國應劭曰下相水出沛國相縣故此加下也然則下相又是睢水之別名也東南流入于泗謂之睢口經止蕭縣非也所謂得其一而亾其二矣

瓠子河出東郡濮陽縣北河

縣北十里卽瓠河口也尚書禹貢雷夏旣澤雝沮會同爾雅曰水自河出爲雝許慎曰雝者河雝水也暨漢元光之年河水南洑漂害民居武帝元封二年上使汲仁郭昌發卒數萬人塞瓠子決河於

是上自萬里沙還臨決河沈白馬王璧令羣臣將軍以下皆負薪填決河上悼功之不成乃作歌曰瓠子決兮將奈何殫爲河兮地不寧功無已時兮吾山平吾山平兮巨野溢魚沸鬱兮柏冬日正道弛兮離常流蛟龍騁兮放遠遊歸舊川兮神哉沛不封禪兮安知外皇謂河公兮何不仁泛濫不止兮愁苦人齧桑浮兮淮泗滿久不反兮水唯緩一曰河湯湯兮激潺湲北渡迴兮迅流難塞長茭兮湛美玉隕竹林兮捷石菑宣防塞兮萬福來於是卒塞瓠子口築宮於其上名曰宣房宮水亦謂瓠

子堰爲宣房堰而水亦以瓠子受名焉平帝已後
未及修理河水東浸日月彌廣永平十二年顯宗
詔樂浪人王景治渠築隄起自滎陽東至于乘一
千餘里景乃防遏衝要䟽決壅積瓠子之水絕而
不通唯溝瀆存焉河水舊東河逕濮陽城東北故
衛也帝顓頊之墟昔顓頊自窮桑徙此號曰商丘
或謂之帝丘本陶唐氏火正闕伯之所居亦夏伯
昆吾之都殷之相又都之故春秋傳曰闕伯居商
丘相土因之是也衛成公自楚丘遷此秦始皇徙
衛君角於野王置東郡治濮陽縣濮水逕其南故

曰濮陽也沛公守濮陽環之以水張晏曰依河水
自固春秋僖公十三年夏會于鹹杜預曰東郡濮
陽縣東有咸城者也是瓠子故瀆又東逕桃城南
春秋傳曰分曹地自洮盡曹地也今甄城西南五
十里有桃城或謂之洮也瓠瀆又東南逕清丘北
春秋宣公十二年經書楚滅蕭晉人宋衛曹同盟
于清丘京相璠曰在今東郡濮陽縣東南三十里
魏都尉治

東至濟陰句縣爲新溝

瓠河故瀆又東逕句陽之小成陽城北城北側瀆

帝王世紀曰堯葬濟陰成陽西北四十里是爲穀
墨子以爲堯堂高三尺土階三等北教八狄道死
葬蛩山之陰山海經曰堯葬狄山之陽一名崇山
二說各殊以爲成陽近是堯冢也余按小成陽在
成陽西北羊里許實牛俗彥以爲囚堯城士安蓋
以是爲堯冢也瓠子北有都關縣故城縣有羊里
亭瓠河逕其南爲羊里水蓋資城地而變名由經
有新溝之異稱矣黃初中賈逵爲豫州刺史與諸
將征吳於洞浦有功魏封逵爲羊里亭侯邑四百
戶卽斯亭也俗名之羊子城非也蓋韻近字轉耳

又東右會濮水之津水上承濮渠東逕鉏丘城南
京相璠曰今濮陽城西南十五里有沮丘城六國時
沮楚同以爲楚丘非也又東逕浚城南而北去濮
陽三十五里城側有寒泉岡卽詩所謂爰有寒泉
在浚之下世謂之高平渠非也京相璠曰濮水故
道在濮陽南者也又東逕句陽縣西句瀆出焉濮
水枝渠又東北逕句陽縣之小成陽縣故東垂亭
西而北入瓠河地理志曰濮水首受沛於封丘縣
東北至都關入羊里水者也又按地理志山陽郡
有都關縣今其城在廩丘城西考地志山陽廩丘

俱屬濟陰則都關無隸山陽理又按地理志邳都亦是山陽之屬縣矣而東杜考地驗城又並言在廩丘城南推此而論似地志之悞矣或亦疆理參差所未詳瓠瀆又東逕垂亭北春秋隱公八年宋公衛侯遇于大丘經書垂也京相璠曰今濟陰句陽縣小城陽東五里有故垂亭者也

又東北過廩丘縣爲濮水

瓠河又左逕雷澤北其澤藪在大城陽縣故城西北一十餘里昔華胥履大跡處也其陂東西二十餘里南北一十五里卽舜所漁也澤之東南卽成

陽縣故史記曰武王封弟季載於成應劭曰其後乃遷于成之陽故曰成陽也地理志曰成陽有堯冢靈臺今成陽城西二里有堯陵陵南一里有堯母慶都陵於城爲西南稱曰靈都鄉曰崇仁邑號修義皆立廟四周列水潭而不流水澤通泉泉不耗竭至豐魚笱不敢採捕前並列數碑枯柏數株檀馬成林二陵南北列馳道逕通皆以磚砌之尚修整堯陵東城西五十餘步中山夫人祠堯妃也石壁階墀仍舊南西北三面長櫟聯蔭扶踈里餘中山夫人祠南有仲山甫冢冢西有石廟羊虎傾

低破碎略盡於城爲西南在靈臺之東北按郭緣
生述征記自漢迄晉二千石及丞尉多刊石述叙
堯卽位至永嘉三年二千七百二十有一載記于
堯妃見漢建寧四年五月成陽令管遵所立碑文
云堯陵北山甫墓南二冢間伍員祠晉大安中立
一碑是永興中建今碑祠並無處所又言堯陵在
城南九里中山夫人祠在城南二里東南六里堯
毋慶都冢堯陵北二里有仲山甫墓考地驗狀咸
爲踈僻蓋聞疑書疑耳雷澤西南十許里有小山
孤立峻上亭亭巖峙謂之歷山山北有小阜南屬

池澤之東北有陶墟緣生言舜耕陶所在墟阜聯
屬瀆帶瓠河也鄭玄曰歷山在河東今有舜井皇
甫謚或言今濟陰歷山是也與雷澤相比余謂鄭
玄之言爲然故楊雄河東賦曰登歷觀而逕望今
聊浮游於河之巖今雷首山西枕大河校之圖緯
於事爲允士安又云定陶西南陶丘舜也不言在
此緣生爲失瓠河之北卽廩丘縣也王隱晉書地
道記曰廩丘者春秋之所謂齊邑矣實表東海者
也竹書紀年晉烈公十一年田悼子卒田布殺其
大夫公孫公孫以廩丘叛于趙田布圍廩丘翟角

趙孔肩韓師救廩丘及田布戰于龍澤田布敗遁
是也瓠河與濮水俱東流經所謂過廩丘爲濮水者
也縣南瓠北有羊角城春秋傳曰取晉羊角遂襲
我高魚天大雨自竇入介其庫登其城尅而取之
者也京相璠曰衛邑也今東郡廩丘縣南有羊角
城今魯邑也今廩丘東北有故高魚城俗謂之交
魚城謂羊角爲角逐城皆非也瓠河又逕陽晉城
南史記蘇秦說齊曰過衛陽晉之道徑于亢父之
嶮者也今陽晉城在廩丘城東南一十餘里與都
關爲左右也張儀曰秦下甲攻衛陽晉大關天下

之匈徐廣史記音義云關一作開東之亢父則其
道矣瓠河之北又有邲都城春秋隱公三年邲侵
衛京相璠曰東都廩丘縣南三十里有故邲都地
理志曰山陽鄉也褚先生曰漢封金安上爲侯國
王莽更名之曰城穀者也瓠河又東逕黎縣故城
南王莽改曰黎治矣孟康曰今黎陽也薛瓚言按
黎陽在魏郡非此黎陽也世謂黎侯城昔黎侯陽
寓于衛詩所謂胡爲乎泥中毛云泥中邑名疑此
城也土地汙下城居小阜魏濮陽郡治也瓠河又
東逕柘縣故城南地理志曰濟陰之屬縣也褚先

生曰漢武帝封金日磾爲侯國王莽之萬歲矣世猶謂之爲萬歲亭也瓠河又東逕鄆城南春秋左傳成公十六年公自沙隨還侍于鄆京相璠曰公羊作運字今東郡廩丘縣東八十里有故運城卽此城也

又北過東郡范縣東北爲濟渠與將渠合

瓠河自運城東北逕范縣與濟濮枝渠合故渠上承濟瀆於乘氏縣北逕范縣左納瓠瀆故經有濟渠之稱又北與將渠受河於范縣西北東南逕秦亭南杜預釋地東平范縣西北有秦亭也又東南

逕范縣故城南王莽更名建睦也漢興平中靳允爲范令曹太祖東征陶謙於徐州張邈迎呂布郡縣響應程昱說允曰君必固范我守東阿田單之功可立即斯邑也將渠又東會濟渠自下通謂之將渠北逕范城東俗又謂之趙溝非也

又東北過東阿縣東

瓠河故瀆又東北左合將渠枝瀆上承將渠於范縣東北逕范縣北又東北逕東阿城南而東入瓠河故瀆又北逕東阿縣故城東春秋經書冬及齊侯盟于柯左傳曰冬盟于柯始及齊平杜預曰東

阿卽柯邑也按國語曹沫挾匕首劫齊桓公返遂邑於此矣

又東北過臨邑縣西又東北過茌平縣東爲鄧里渠自宣防已下將渠已上無復有水將渠下水首受河自北爲鄧里渠

又東北過祝阿縣爲濟渠

河水自泗口出爲濟水濟水二瀆合而東注于祝阿也

又東北至梁鄒縣西分爲二

脉水尋梁鄒濟無二流蓋經之誤

其東北者爲濟河其東者爲時水又東北至濟西濟河東北入于海時水東至臨淄縣西屈南過太山華縣東又南至費縣東入于沂

時卽彤水也音而春秋襄公三年齊晉盟于彤者也京相璠曰今臨淄唯有澧水西北入沛卽地理志曰如水矣彤如聲相似然則澧水卽彤水也蓋以澧與時合得通稱矣時水自西安城西南分爲二水枝津別出西流德會水注之水出昌國縣黃山西北流逕昌國縣故城南昔樂毅攻齊有功燕昭王以是縣封之爲昌國君德會水又西北五里泉

水注之水出縣南黃阜北流逕城西西北入德會又西北世謂之滄浪溝又北流注時水地理志曰德會水出昌國西北至西安入洳是也時水又西逕東高苑城中而西注也俗人過令側城南注又屈其城南史記漢文帝十五年分齊爲膠西上國都高邑徐廣音義曰樂安有高苑城故俗謂之東苑也其水又北注故瀆又西蓋野溝水注之源導延鄉城東北平地出泉西北逕延鄉城北地理志曰千乘有延鄉縣世人謂故城爲從城延從字相似讀隨字改所未詳也西北流世謂之蓋野溝又西

北流逕高苑縣北注時水時水又西逕西高苑縣故城南漢高帝六年封丙倩爲侯國王莽之常鄉也其水側城西注京相璠曰今樂安博昌縣南界有時水西通濟其上源出盤陽北至高苑下有苑時中無水杜預亦云時水於樂安枝流旱則竭涸爲春秋之乾時也左傳莊公九年齊魯戰地魯師敗處也時水西北至梁鄒城入于沛非沛入時蓋時來注沛若沛分東流明不得以時爲名尋時沛更無別流南延華費之所斯爲謬矣

汶水出太山萊蕪縣原山西南過羸縣南

萊蕪縣在齊城西南原山又在縣西南六十許里
地理志汶水與淄水俱出原山西南入沛故不得
過其縣南也從徃記曰汶水出縣西南流又言自
入萊蕪谷夾路連山百數里水隍多行石澗中出
草藥饒松柏林藿綿濛崖壁相望或傾岑阻徑或
迴巖絕谷清風鳴條山壑俱響凌高降深兼惴慄
之懼危溪徑過懸度之艱未出谷十餘里有別谷
在孤山谷有清泉泉上數丈有石穴二口容人行
入穴丈餘高九尺許廣四五丈言是昔人居山之
處薪爨煙墨猶存谷中林木緻密行人尠有能至

矣又有少許山田引灌之蹤尚存出谷有平丘面
山傍水土人悉以種麥云此丘不宐殖稷黍而宐
麥齊人相承以殖之意謂麥丘所栖愚公谷也何
其深沈幽翳可以託業怡生如此也余時逕此爲之
踟躕爲之屢眷矣余按麥丘愚公在齊川谷猶傳
其名不在魯蓋誌者之謬耳汶水又西南逕羸縣
故城南春秋左傳桓公三年云會齊侯于羸博婚
于齊也

又東南過奉高縣北

奉高縣漢武帝元封元年立以奉太山郡治也縣

北有吳季札子墓在汶水南曲中季札之聘上國也喪子於嬴博之間卽此處也從征記曰嬴縣西六十里有季札兒冢冢圓其高可隱也前有石銘一所漢末奉高令所立無所述叙標誌而已自昔恒蠲民戶灑掃之今不能然碑石糜碎靡有遺矣唯跌存焉

屈從縣西南流

汶出牟縣故城西南阜下俗謂之胡盧堆淮南子曰汶出弗其高誘曰山名也或斯阜也牟縣故城在東北古牟國也春秋時牟人朝魯故應劭曰魯

附庸也俗謂是水爲牟汶也又西南逕奉高縣故城而西南流注于汶汶水又南右合北汶水出分水谿源與中川分水東南流逕太山東右天門下谿水水出太山天門下谷東流古者帝王升封咸憇此水水上往往有石竅存焉蓋古設舍所跨處也馬第伯書云光武封太山第伯從登山去平地二十里南向極望無不覩其爲高也如視浮雲其峻石壁窅窳仰視巖石松樹鬱鬱蒼蒼如在雲中俯視谿谷碌碌不可丈尺直上七十里天門仰視天門如從穴中視天矣應劭漢官儀云太山東南

山頂名曰日觀者雞一鳴時見日始欲出長三丈許故以名焉其水自谿而東濬波注壑東南流逕龜陰之龜田山在博縣北一十五里昔夫子傷政道之陵遲故望山而懷操故琴操有龜山操焉山北卽龜陰之田也春秋定公十年齊人來歸龜陰之田是也又合環水水出太山南谿南流歷中階兩廟間從征記曰太山有下中上三廟牆闕嚴整廟中柏樹夾兩階大二十餘圍蓋漢武所植也赤眉嘗斫一樹見血而止今斧創猶存門閣三重樓榭四所三層壇一所高丈餘廣八丈樹前有大井極

香冷異於凡水不知何代所掘不嘗浚渫而水旱不減庫中有漢時故樂器及神車木偶皆靡密巧麗又有石勒建武十三年未貴侯張余上金馬一匹高二尺餘形制甚精中廟去下廟五里屋宇又崇麗於下廟廟東西夾澗上廟在山頂卽封禪處也其水又屈而東流入于汶水又東南流逕南明堂下漢武帝元封元年封太山降坐明堂於山之東北陞武帝以古處嶮狹而不顯也欲治明堂於奉高傍而未曉其制濟南人公玉帶上黃帝時明堂圖圖中有一殿四面無壁以茅蓋之通水園宮

垣爲復道上有樓從西南入名曰崑崙天子從之
入以拜祀上帝焉於是上令奉高作明堂於汶水
如帶圖也古引水爲壁雍處基瀆存焉世謂此水
爲石汶山海經曰環水出泰山東流注于江卽此
水也環水又左入於汶水汶水又西南流逕徂徠
山西山多松柏詩所謂岨岨之松也廣雅曰道梓
松也抱朴子稱玉策記曰千歲之松中有物或如
青牛或如青犬或如人皆壽萬歲又稱天陵有偃
蓋之松也所謂樓松也魯連子曰松樅高千仞而
無枝非憂王實之無柱也爾雅曰松葉柏身曰樅

鄒山記曰徂岨山在梁甫奉高傳三縣界猶有美
松亦曰尤岨之山也赤眉渠帥樊崇所堡也故崇
自號尤岨三老矣山東巢父廟山高十里山下有
陂水方百許步三道流注一水東北沿谿而下屈
逕縣南西北流入于一水北流歷澗西流入于汶
一水南流逕陽關亭南春秋襄公十七年逆臧紇
自陽關者也又西流入于汶水也

過博縣西北

汶水南逕博縣故城東春秋哀公十一年會吳伐
博者也灌嬰破田橫於城下屈從其城南西流不

在西北也汶水又西南逕龍鄉故城南春秋成公二年齊侯圍龍龍囚頃公嬖人盧蒲就殺而膊諸城上齊侯親鼓取龍者也漢高帝八年封謁者陳署爲侯國汶水又西南逕亭亭山東黃帝所禪也山有神廟水上有石門舊分水下漑處也汶水又西南逕陽關故城西本有平縣之陽關亭矣春秋襄公十七年逆臧紇自陽關者也陽虎據之以叛伐之虎焚萊門而奔齊者也汶水又南左會淄水水出太山梁父縣東西南流逕菟裘城北春秋隱公十一年營之公謂羽父曰吾將歸老焉故郡國

志曰梁父有菟裘聚淄水又逕梁父縣故城南縣北有梁父山開山圖曰太山在左亢父在右亢父知生梁甫主歿王者封太山禪梁甫故縣取名焉淄水又西南逕柴縣故城北地理志曰太山之屬縣也世謂之柴汶矣淄水又逕郕北漢高帝六年封董濞爲侯國春秋齊師圍郕郕人伐齊飲馬於斯水也昔孔子行於郕之野遇榮啓期於是衣鹿裘被髮琴歌三樂之懽夫子善其能寬矣淄水又西逕陽關城南西流注於汶水汶水又南逕巨平縣故城東而西南流城東有魯道詩所謂魯道有蕩齊

子由歸者也今汶上夾水有文姜臺汶水又西南流詩云汶水滔滔矣淮南子曰貉渡汶則死天地之性倚伏難尋固不可以情理窮也汶水又西南逕魯國汶陽縣北王莽之汶亭也縣北有曲水池亭春秋桓公十二年經書公會祀侯莒子於曲池左傳曰平杞莒也故杜預曰魯國汶陽縣北有曲水亭漢章帝元和三年東巡太山立行宮於汶陽執金吾耿恭恭屯城門於汶上基漸存焉世謂之闕陵城也汶水又西逕汶陽縣故城北而注又西南過蛇丘縣南

汶水又西洗水出焉又西逕蛇丘縣南縣治鑄鄉故城春秋左傳宣叔娶于鑄是也杜預曰濟北蛇丘縣所治鑄鄉城者也

又西南過岡縣北

地理志鄉故闡也王莽更之曰柔也應劭曰春秋經書齊人取謹及闡亭是也杜預春秋釋地曰闡在岡縣北岡城東有一小亭今岡縣治俗人又謂之關亭京相璠曰岡縣西四十里有闡亭未知孰是汶水又西蛇水注之水出縣東北太山西南流逕汶陽之田齊所侵也自汶之北平暢極目僖公

以賜季友蛇水又西南逕鑄城西左傳所謂蛇淵
圃也故京相璠曰今濟北有蛇丘城城下有水魯
圃也俗謂之濁須水非矣蛇水又西南逕夏暉城
南經書公會齊侯于下謹是也今俗謂之夏暉城
蓋春秋左傳桓公三年公子翬如齊齊侯送姜氏
于下謹非禮是也世有夏暉之名矣蛇水又西南
入汶汶水又西溝水注之水出東北馬山西南流
逕棘亭南春秋成公三年經書秋叔孫僑如帥師
圍棘左傳曰取汶陽之田棘不服圍之南去汶水
八十里又西南逕遂城東地理志曰蛇丘隧鄉故

隧國也春秋莊公十三年齊滅隧而戍之者也京
相璠曰隧在蛇丘東北十里杜預亦以爲然然縣
東北無城以擬之今城在蛇丘西北蓋杜預傳疑
之非也又西逕下謹城西而入汶水汶水又西逕
春亭北考古無春名唯平陸縣有崇陽亭然是東
去岡城四十里進璠所注則符並所未詳也
又西南過平章縣南

地理志曰東平國故梁也景帝中和六年別爲濟
東國武帝元鼎元年爲大河郡宣帝甘露二年爲
東平國王莽之有鹽城也章縣按世本任姓之國也齊

人降章者也故在無鹽城東北五十里汶水又西南有泌水注之水出肥縣東北自源西南流逕肥城縣故城南樂正子春謂其弟子曰子適齊過肥肥有君子焉左逕句窳亭北章帝元和二年鳳凰集肥城句窳亭後其祖而巡太山卽是亭也泌水又西南逕富城縣故城西王莽之成富也其水又西南流注於汶汶水又西南逕桃鄉縣故城西王莽之鄆亭也世以此爲鄆城非蓋因巨新之故目耳

又西南過無鹽縣南又西南過壽張縣北又西南至安民亭入于濟

汶水自桃鄉四分當其派別之處謂之四汶口其左二水雙流西南至無鹽縣之郕鄉城南魯叔孫昭伯之故邑也禍及鬪雞矣春秋左傳定公十二年叔孫氏墮郕今其城無南面汶水又西南逕其平陸縣故城北應劭曰古厥也今有厥亭汶水又西逕危山南世謂之龍山也漢書五行志曰哀帝時無鹽危山土自起覆草如馳道狀又報山石轉立晉灼曰漢注作報山山脇石一丈轉側起立高九丈尺六寸傍行一丈高四尺東平王雲及后謁

自之石所祭治石象報山立石束倍草并祠之建
平三年息夫躬告之王自殺后謁棄市國除漢書
石立宣帝起之象也汶水又西合爲一水西南入
茂都澱澱陂水之異名也澱水西南出謂之巨野
溝又西南逕致密城南郡國志曰須昌縣有致密
城古中都也卽夫子所宰之邑矣制養生送死之
節長幼男女之禮路不拾遺器不彫僞矣巨野溝
又西南入桓公河北水西出澱謂之臣良水西南
逕致密城北西南流注洪瀆次一汶西逕郈亭北
又西至壽張故城東遂爲澤渚初平三年曹公擊

黃巾於壽張東鮑信戰歿於此其右一汶西流逕
無鹽縣之故城南舊宿國也齊宣后之故邑所謂
無鹽醜女也漢武帝元朔四年封城陽恭王子劉
慶爲東平侯卽此邑也王莽更名之曰有鹽亭汶
水又西逕洽鄉城南地理志曰所謂無鹽有洽鄉
者也汶水西南流逕壽張縣故城北春秋之良縣
也縣有壽聚漢曰壽良應劭曰世祖叔母名良故
允武改曰壽張也建武十五年世祖封樊宏爲侯
國汶水又西南長直溝水注之水出須昌城東北
穀陽山南逕須昌城東又南漆溝水注焉水出無

鹽城東北五里阜山下西逕無鹽縣故城北水側
有東平憲王倉冢碑闕存焉元和三年章帝幸東
平祀以太牢親拜祠坐賜御劔於陵前其水又西
流注長直溝溝水奇分爲二一水西逕須昌城南
入浦一水南流注於汶汶水又西流入浦故淮南
子曰汶出弗其西流合浦高誘云弗其山名在朱
虛縣東余按誘說是乃東汶非經所謂入沛者也
蓋其誤證耳

水經第二十四

